

嘉慶松江府志

松江府志卷四十九

古今人傳一

松郡鍾峯泖之秀自今日上溯漢書代有偉人人文之盛有由來矣

聖代作養人材士氣尤振百數十年名臣碩彥連袂接軫不有記載何以媲美往代垂示來茲至於行敦孝友義重鄉閭足以風世勵俗者胥不聽其泯滅往者傳斯來者勸耳謹遵

大清一統志例統爲列傳無庸分隸各門庶後之覽者知一行足取皆所不遺也志古今人傳

漢

陸閔字子春暢之子世爲族姓篤行好學聰明有令德選
尚寧平公主辭疾不應爲潁川太守致鳳凰甘露之瑞
建武中爲尚書令姿容如玉喜著越布單衣光武升臺
見之歎曰南方固多佳人自是常敕會稽郡獻越布焉

後漢書

張武者吳郡由拳人也父業郡門下掾送太守妻子還鄉
里至河內亭盜夜劫之業與賊戰死遂亡失尸骸武時
年幼不及識父後之太學受業每節常持父遺劍至亡
處祭醊而還太守第五倫嘉其行舉孝廉遭母喪過毀

傷父魂靈不返因哀慟絕命

後漢書

陸續字智初閩孫幼孤爲太守尹興門下掾興坐楚王英事徵詣廷尉獄續就考肌肉消爛終無異詞續母至京餽食付門卒以進續對食悲泣人問其故續曰母來不得相見故泣又問何以知母所作羹續曰母截肉未嘗不方斷蔥以寸爲度是以知之帝聞卽赦興等事還田里續以老病卒

後漢書

卞崇婁縣人桓帝時太守薛固爲法吏所枉下廷尉崇與烏程錢讓詣闕稱冤廷尉囚崇等以兵圍守楚毒備至崇讓確然無撓聲枉彌厲帝聞而奇之乃赦固罪

陳志傳行

陸康字季寧續少子褒之子也少仕郡以義烈稱刺史臧
旻舉茂才除高成令縣在邊垂舊制令戶一人具弓弩
以備不虞不得行來長吏新到輒發民繕脩城郭康至
皆罷遣百姓大悅以恩信爲治寇盜亦息州郡表上其
狀光和元年遷武陵太守轉桂陽樂安二郡所在稱之
時靈帝欲鑄銅人詔民田畝斂十錢康上疏諫內倖因
譖康大不敬檻車徵詣廷尉侍御史劉岱爲表陳解免
歸田里復徵爲議郎拜廬江太守擊破郡賊黃穰等降
其餘黨獻帝卽位天下大亂康蒙險遣孝廉計吏奉貢
加忠義將軍時袁術屯兵壽春部曲飢餓遣使求委輸

兵甲康以其叛逆閉門不通修戰備以禦之術怒遣將孫策攻康圍城數重康固守受敵二年城陷月餘病卒年七十朝廷憫其守節拜子儁爲郎中少子續自有傳

後漢書

徐栩字敬卿吳由拳人居華亭谷少爲獄吏執法詳平爲小黃令時屬縣大蝗野無青草過小黃界飛逝不集刺史行部責栩不治栩棄官歸蝗應聲而至刺史謝令還寺舍蝗卽飛去

陳志
賢達

吳

陸績字公紀父康爲廬江太守績年六歲於九江見袁術

術出橘績懷三枚去拜辭墮地術謂曰陸郎作賓客而懷橘乎績跪答曰欲歸遺母術大奇之孫策在吳張昭張紘秦松爲上賓共論四海未泰須當用武治而平之績年少末坐遙大聲言曰昔管夷吾相齊桓九合諸侯一匡天下不用兵車孔子曰遠人不服則修文德以來之今論者不務道德懷取之術而惟尙武績雖童蒙竊所未安也昭等異焉績容貌雄壯博學多識星術算數無不該覽虞翻舊齒名盛龐統荊州令士年亦差長皆與績友善孫權統事辟爲奏曹掾以直道見憚出爲鬱林太守加偏將軍給兵二千人績既有覽疾又意在儒

雅非其志也雖有軍事著述不廢豫自知亡日乃爲辭
曰有漢志士吳郡陸績幼敦詩書長玩禮易受命南征
遘疾遇厄遭命不幸嗚呼悲隔又曰從今已去六十年
之外車同軌書同文恨不及見也年三十二卒長子宏
會稽南部都尉次子獻長水校尉

吳志

陸遜字伯言少孤隨從祖康在官袁術將攻康康遣遜及
親戚還吳爲之經紀門戶始仕孫權幕府歷東西曹令
史出爲海昌屯田都尉領縣事開倉賑貧勸督農桑召
兵討治會稽山賊潘臨所向皆服鄱陽賊尤突作亂復
往討之拜定威校尉權以兄策女配遜用爲帳下右部

督數訪世務多納其策丹陽賊費棧受曹操印綬扇動
山越爲內應權遣遜討棧應時破散遂部伍東三郡強
者爲兵羸者補戶得精兵數萬人宿惡盪除所過肅清
召拜偏將軍右部督代呂蒙鎮陸口書與關某謙下自
託某意大安遜卽陳其可擒之要權乃潛軍而上使遜
爲前部克公安南郡進領宜都太守拜撫邊將軍封華
亭侯復遣將軍李異等攻破蜀將詹晏陳鳳及房陵太
守鄧輔南鄉太守郭睦秭歸大姓文布鄧凱等爲右護
軍鎮西將軍進封婁侯黃武元年劉備率大衆來向西
界權命遜爲大都督假節督朱然等五萬人拒之斬其

將張南馮習等破四十餘營備將杜路等窮迫請降備
夜遁加輔國將軍領荊州牧改封江陵侯劉禪襲位諸
葛亮秉政與權連和時事所宜權輒令遜語亮并刻權
印以置遜所權每與禪亮書常過示遜輕重可否有所
不安便令改定以印封行之七年權使鄱陽太守周魴
譎魏大司馬曹休休果舉衆入皖乃召遜假黃鉞爲大
都督逆休遜自爲中部令朱桓全琮爲左右翼三道俱
進衝休兵走之追亡逐北至夾石斬獲萬餘休還死黃
龍元年拜上大將軍右都護權巡建業留太子等徵遜
輔之并掌荊州豫章三郡事赤烏七年代顧雍爲丞相

其州牧都護領武昌事如故先是二宮竝闕遜上疏陳
太子正統宜有磐石之固魯王藩臣當使寵秩有差而
遜外生顧譚顧承姚信竝以親附太子枉見流徙太子
太傅吾粲坐數與遜交書下獄死權累遣中使責讓遜
遜憤恚卒年六十三孫休時追謚昭侯

吳志

陸瑁字子璋遜弟也少好學篤義陳國陳融陳留濮陽逸
沛郡蔣纂廣陵袁迪等皆單貧有志就瑁游處瑁割少
分甘與同豐約同郡徐原爰居會稽素不相識臨死遺
書託以孤弱瑁爲起立墳墓收導其子從父績早亡二
男一女瑁迎攝養至長乃別時尙書暨監盛明臧否差

斷三署頗揚人闇昧以顯其譴瑁與書曰今王業始建
乃漢高棄瑕錄用之時若令善惡異流誠可以厲俗明
教然恐未易行也豔不能行卒致敗嘉禾元年徵拜議
郎選曹尚書孫權忿公孫淵反覆欲親征之瑁上疏言
昔尉佗叛逆僭號稱帝於時天下又安百姓殷阜帶甲
之數糧食之積可謂多矣然漢文猶以遠征不易重興
師旅告諭而已今凶桀未殄疆場猶警雖蚩尤鬼方之
亂故當以緩急差之未宜以淵爲先權覽瑁書嘉其詞
理端切遂不行赤烏二年卒

吳志

陸抗字幼節遜之子孫策外孫也初拜建武校尉赤烏九

年遷立節中郎將與諸葛恪換屯柴桑抗臨去繕完城
圍葺其牆屋居廬桑果不得妄敗恪入屯儼然若新而
恪柴桑故屯頗有毀壞深以爲慚建興元年拜奮威將
軍太平二年魏將諸葛誕舉壽春降拜抗爲柴桑督赴
壽春破魏牙門將遷征北將軍永安二年拜鎮軍將軍
都督西陵孫皓卽位加鎮軍大將軍領益州牧都督信
陵西陵夷道樂鄉公安諸軍事聞都下政令多闕乃上
疏陳時宜十七條時何定弄權閹宦與政又上疏請隨
才授職抑黜羣小鳳凰元年西陵督步闡叛降晉抗部
分諸軍赴西陵敕築嚴圍自赤谿至故市內以圍闡外

以禦寇晝夜催切衆甚苦之諸將咸諫抗曰此城處勢
既固糧穀又足且繕修禦備之具皆抗所宿規今反身
攻之既非可卒克且北救必至至而無備何以禦之及
諸將攻闌果無利圍備始合晉羊祜率師向江陵抗敕
江陵督張咸作大堰遏水漸漬平中以絕寇叛祜欲因
所遏水浮船運糧揚聲將破堰以通步軍抗聞使咸亟
破之祜至常陽聞堰敗乃改船以車運大損功力祜將
楊肇至西陵抗率三軍憑圍對肇都督俞贊亡詣肇抗
曰贊軍中舊吏知吾虛實吾常慮夷兵素不簡練若敵
攻圍必先此處卽夜易夷民皆以舊將充之明日肇果

攻故夷兵處抗命旋車擊之矢石兩下肇衆傷死者相
屬經月乃遁抗使輕兵躡之肇大敗祐等引軍還抗遂
拔西陵誅闡東還樂鄉貌無矜色謙沖如常故得將士
歡心二年春就拜大司馬荊州牧三年夏病上疏以西
陵建平國之蕃表力陳易失之勢及乞簡閱一切料出
以補疆場受敵常處若臣死之後乞以西方爲屬秋遂
卒子晏嗣晏及弟景元機雲分領抗兵晏爲裨將軍夷
道監天紀四年晉軍伐吳王濬順流東下所至輒克終
如抗慮景字士仁澡身好學著書數十篇以尙公主拜
騎都尉封毘陵侯旣領抗兵拜偏將軍中夏督與兄晏

俱爲王濬別軍所害機雲自有傳

吳志

陸凱字敬風遜族子也黃武初爲永興諸暨長有治迹拜
建武都尉雖統軍衆手不釋書好太元論演其意以箴
輒驗赤烏中除儋耳太守討朱崖有功遷建武校尉五
鳳二年討斬山賊陳慈於零陵封都鄉侯轉武昌右部
督景帝卽位拜征北將軍孫皓立歷鎮西大將軍荊州
牧進封嘉興侯寶鼎元年遷左丞相皓性不好人視己
羣臣侍見皆莫敢迂凱說皓曰夫君臣無不相識之道
若卒有不虞不知所赴皓聽凱自視時徙都武昌揚土
百姓汭流供給以爲患苦又政事多謬黎元窮困凱上

疏切諫殿上列將何定佞巧貴倖凱當面責定大恨思
中傷之凱終不以爲意建衡元年疾病皓遣使問所欲
言凱陳何定宜授外任不可委以國事姚信樓元賀邵
張梯郭連薛瑩滕修及族弟喜抗或清白忠勤或姿才
卓茂皆社稷之楨幹願陛下訪以時務俾各盡其忠卒
年七十二子禕初爲黃門侍郎出領部曲拜偏將軍凱
亡後入爲太子中庶子右國史華覈表薦曰禕體質方
剛器幹彊固在戎果毅臨財有節夏口當賊之衝要宜
選名將以鎮戍之臣竊思維莫善於禕初皓常銜凱數
犯顏忤旨加何定譖搆非一旣以重臣難繩以法又陸

抗時爲大將在疆場故以計容忍抗卒後竟徙凱家於

建安禕入晉歷太子中庶子

吳志碑云字元容赤烏六年徵

宿衛郎中後遷立義都尉五官郎封海鹽侯按碑所稱

征北將軍及封海鹽侯事吳志不載殆史文有佚脫也

陸允字敬宗右丞相凱弟始爲御史尙書選曹郎太子和

聞其名待以殊禮會和與魯王霸分爭敬宗坐收下獄

楚毒備至終無他辭後爲衡陽督軍都尉赤烏十一年

交趾九真夷賊攻沒城邑以敬宗爲交州刺史安南校

尉諭以恩信務崇招納高涼渠黨皆降交域清泰就加

安南將軍復討蒼梧建陵賊破之永安元年徵爲西陵

督封都亭侯後轉左虎林中書丞華覈表敬宗天姿聰

明才通行潔昔歷選曹遺迹可紀還撫交州流民歸附
商旅平行民無疾疫田稼豐稔州治臨海海流秋鹹敬
宗蓄水民得甘食惠風橫被化感人神遂憑天威招合
遺散在州十有餘年內無粉黛附珠之妾家無文甲犀
象之珍宜在輦轂股肱王室敬宗卒子式嗣爲柴桑督

揚武將軍

吳志

顧邵字孝則與舅陸績齊名權妻以策女起家爲豫章太
守下車祀先賢徐孺子墓優待其後禁淫祀非禮之祭
小吏資質佳者令就學擇其先進擢置右職風化大行
在郡五年卒官子譚承譚字子默弱冠與諸葛恪等爲

太子四友從中庶子轉輔正都尉赤烏中代恪爲左節度每省簿書未嘗下籌屈指心計盡發疑謬祖父雍卒數月拜太常代雍平尙書事是時魯王霸有盛寵與太子和齊衡譚上疏諫霸與全琮子寄構譚坐徙交州著新言二十篇卒於交趾承字子直嘉禾中與舅陸瑁俱以禮徵芍陂之役拜奮威將軍與譚俱徙交州卒

三國吳志

晉

陸喜字文仲一字恭仲瑁子仕吳累遷吏部尙書少有聲名好學有才思嘗爲自序其略曰劉向省新語而作新序桓譚詠新序而作新論予不自量感子雲之法言而

作言道觀賈子之美才而作訪論觀子政洪範而作古
今歷覽蔣子通萬機而作審機讀幽通思元四愁而作
娛賓九思眞所謂忍愧者也其書近百篇吳平又作西
州清論借稱諸葛孔明以行其書太康中爲散騎常侍
尋卒子育爲尚書郎弋陽太守

晉書

陸機字士衡抗子身長七尺其聲如鐘少有異才文章冠
世抗卒領其兵爲牙門將年二十而吳滅退居舊里積
學十年以祖父世爲將相有大勳於江表深慨孫皓舉
而棄之論權皓得失并述祖父功業作辨亡論二篇太
康末與弟雲俱入洛造張華華素重其名如舊相識曰

伐吳之役利獲二俊薦之諸公楊駿辟爲祭酒駿誅累
遷太子洗馬著作郎吳王晏出鎮淮南以機爲郎中令
遷尚書中兵郎轉殿中郎趙王倫輔政引爲相國參軍
與誅賈謐功賜爵關中侯倫將篡位以爲中書郎倫誅
齊王回收機赴廷尉成都王穎吳王晏竝救理之滅死
徙邊遇赦而止時成都王穎勞謙下士機旣感恩又見
朝廷屢有變難謂穎必能康隆晉室遂委身焉穎以機
參大將軍事表爲平原內史太安初穎與河間王禺起
兵討長沙王乂假機後將軍河北大都督督中郎將王
粹冠軍將軍牽秀等諸軍二十餘萬人機以三世爲將

道家所忌又羈旅入宦頓居羣士之右固辭不許機鄉人孫惠亦勸機讓都督於粹機曰將以我爲首鼠避賊適所以速禍也遂行機始臨戎而牙旗折意甚惡之列軍自朝歌至河橋鼓聲聞數百里漢魏以來出師之盛未嘗有也長沙王乂奉天子與機戰於鹿苑機軍大敗初宦人孟玖弟超竝爲穎所嬖寵超領萬人爲小都督未戰縱兵大掠機錄其主者超宣言於衆曰陸機將反還書與玖言機持兩端軍不速決及戰超不受節度領兵獨進而沒玖疑機殺之遂譖於穎言其有異志將軍王闡郝昌公師藩等皆玖所用與牽秀等共證之穎大

怒使秀密收機機釋戎服著白帔與秀相見神色自若
謂秀曰自吳朝傾覆吾兄弟宗族蒙國重恩入侍帷幄
出剖符竹成都命吾以重任辭不獲已今日受誅豈非
命邪因與穎牋詞甚悽惋旣而歎曰華亭鶴唳可復聞
乎遂遇害年四十三二子蔚夏亦同被害士卒莫不流
涕機天才秀逸辭藻宏麗張華嘗謂之曰人之爲文常
患才少而子更患其多弟雲嘗與書曰君苗見兄文輒
欲焚其筆硯葛洪稱其文猶元圃積玉無非夜光五河
吐流泉源如一其宏麗妍瞻英銳漂逸亦一代之絕乎
其爲人所推如此所著文章三百餘篇竝行於世

晉書

陸雲字士龍機弟也六歲能屬文清正有才理少與機齊名雖文章不及而持論過之號曰二陸年十六舉賢良吳平入洛刺史周浚召爲從事謂人曰士龍今之顏子也俄以公府掾爲太子舍人出補浚儀令縣名難理雲到官肅然下不能欺市無二價人有見殺者主名不立雲錄其妻而無所問十餘日遣出密令人隨後謂曰去不出十里當有男子候之與語便縛來旣而果然問之具服云與此妻通共殺其夫聞妻得出欲與語憚近縣故遠相要候於是一縣稱爲神明郡守害其能屢遣責之雲乃去官百姓追思之畫像配食縣社尋拜吳王晏

郎中令雲愛才好士多所貢達成都王穎表爲清河內
史穎將討齊王同以雲爲前鋒都督同誅轉大將軍右
司馬穎晚節政衰雲屢以正言忤旨孟玖欲用其父爲
邯鄲令雲固執不許玖深忿怨機之敗也并收雲穎官
屬江統蔡克棗嵩等上疏力救之穎惻然有宥雲色孟
玖扶穎入促令殺雲時年四十二有二女無男門生故
吏迎葬清河所著文章三百四十九篇新書十篇並行
於世雲弟耽爲東平祭酒亦有清譽與雲同遇害後東
海王越討穎移檄天下以機雲兄弟枉害罪狀穎云晉書
顧榮字彥先祖雍吳丞相父穆宜都太守榮仕吳爲黃門

侍郎太子輔義都尉吳平與陸機兄弟同入洛時號三
俊拜郎中歷尚書郎廷尉正會趙王倫誅淮南王允收
允僚屬付廷尉皆欲誅之榮平心處當多所全宥及倫
篡位倫子虔爲大將軍以榮爲長史倫敗齊王回召爲
大司馬主簿回誅榮以討葛旛功封嘉興伯轉太子中
庶子長沙王乂爲驃騎復以榮爲長史乂敗轉成都王
穎丞相從事中郎惠帝幸臨漳以榮兼侍中遣行園陵
會張方據洛不得進避之陳留及帝西遷長安徵爲散
騎常侍以世亂不應遂還吳東海王越聚兵徐州以榮
爲軍諮祭酒屬廣陵相陳敏反收禮豪傑假榮右將軍

丹陽內史榮數踐危亡之地恆以恭遜自勉曾敏遣甘卓出橫江堅甲利器盡以委之榮以危言勸卓圖敏卓從之明年周圯與榮及甘卓紀瞻潛謀起兵攻敏榮敏舟南岸敏率萬餘人出不獲濟榮麾以羽扇其衆潰散事平還吳永嘉初徵拜侍中行至彭城見禍難方作遂輕舟而還元帝鎮江東以榮爲軍司加散騎常侍凡所謀畫皆以諮焉榮旣南州望士躬處右職朝野甚推敬之六年卒於官贈侍中驃騎將軍開府儀同三司諡曰元復追封爲公開國食邑子毘嗣官至散騎侍郎書

陸玩字士瑤煜弟器量淹雅元帝引爲丞相參軍時王導

初至江左思結人情請婚於玩玩對曰培塿無松柏薰
蕕不同器玩雖不才義不能爲亂倫之始導乃止玩嘗
謁導食酪因而得疾與導牋曰僕雖吳人幾爲傖鬼其
輕易隳貴如此累加奮武將軍拜侍中遷吏部尚書領
會稽王師讓不拜轉尚書左僕射領本州大中正蘇峻
反遣玩與兄羣守宮城潛說匡術歸順以功封興平伯
轉尚書令授左光祿大夫開府儀同三司加散騎常侍
王導庾亮郗鑒相繼薨以玩有德望乃遷侍中司空玩
雖登公輔謙讓不辟掾屬成帝勸之乃從命所辟皆寒
素有行之士翼亮累世常以宏重爲人主所貴誘納後

進謙若布衣搢紳之徒莫不蔭其德宇卒諡曰康給兵
千人守冢七十家太元中功臣普被減削司空何充等
止得六家以玩有佐命勳先陪陵而葬特置興平伯官
屬以衛墓子始嗣歷侍中尚書

晉書

吾彥字士則出自寒微有文武才幹身長八尺手格猛獸
膂力絕羣仕吳爲通江吏初爲小將給事吳大司馬陸
抗抗奇其勇略拔用之稍遷建平太守時王濬將伐吳
造船於蜀彥覺之請增兵爲備孫皓不從彥乃輒爲鐵
鎖橫斷江路及師臨境緣江諸城皆望風降附或見攻
而拔唯彥堅守不能克乃退舍禮之吳亡彥始歸降武

帝以爲金城太守轉在敦煌威恩甚著遷雁門太守時
順陽王暢驕縱前後內史皆誣之以罪及彥爲順陽內
史清身率下威刑嚴肅衆皆畏懼暢不能誣乃更薦之
冀其去職遷員外散騎常侍會交州刺史陶璜卒以彥
爲南中都督交州刺史重餉陸機兄弟機將受之雪曰
彥本微賤爲先公所拔而答詔不善安可受之機乃止
因此每毀之長沙孝廉尹虞謂機等曰自古出賤而興
者乃有帝王何但公卿若何元幹侯孝明唐儒宗張義
允等竝起自寒微皆內侍外鎮人無譏者卿以士則答
詔小有不善毀之無已吾恐南人皆將去卿卿便獨坐

也於是機等意始解毀言漸息初陶璜之死也九真皮
兵作亂逐其太守九真賊帥趙祉圍郡城彥悉討平之
在鎮二十餘年威恩宣著南州寧靖自表求代徵爲大
長秋卒於官

晉書

陸納字祖言玩弟少清操貞厲絕俗初辟鎮軍大將軍
武陵王掾州舉茂才太原王述雅敬重之引爲建威長
史累遷黃門侍郎本州別駕尚書吏部郎出爲吳興太
守至郡不受祿徵拜左民尚書領州大中正將應召外
白裝幾船納曰私奴裝糧食來無所復須也臨發止有
被襪而已其餘並封還官遷太常徙吏部尚書加奉車

都尉衛將軍謝安嘗欲詣納納殊無供辦兄子俶密爲之具安至納所設惟茶果俶遂陳盛饌客罷納大怒曰汝不能光益父叔乃復穢我素業邪杖之四十其舉措多此類兄子禽犯法應刑乞免官謝罪詔許輕降尋遷尙書僕射加散騎常侍尙書令會稽王道子專政委任羣小納望闕歎曰好家居纖兒欲撞壞之邪朝士咸服其忠亮除左光祿大夫開府儀同三司未拜卒卽以爲贈子長生先卒以弟子道隆嗣元熙中爲廷尉

晉書

張翰字季鷹父儼吳大鴻臚翰有清才善屬文而縱任不拘時人號爲江東步兵會稽賀循赴命入洛經吳閶門

於船中彈琴翰初不相識乃就循言譚便大相欽悅問
循知其入洛翰曰吾亦有事北京便同載卽去不告家
人齊王同辟爲大司馬東曹掾同時執權翰謂同郡顧
榮曰天下紛紛禍難未已有四海之名者求退良難吾
本山林閒人無望於時子善以明防前以智慮後榮執
手愴然曰吾亦與子采南山蕨飲三江水耳翰因見秋
風起乃思吳中菰菜蓴羹鱸魚膾曰人生貴適志何能
羈宦數千里以要名爵乎遂命駕西歸著首邱賦俄而
同敗人皆謂之見機然府以其輒去除吏名翰任心自
適不求當世或謂之曰卿乃可縱適一時獨不爲身後

名邪答曰使吾有身後名不如卽時一杯酒時人貴其曠達性至孝遭母憂哀毀過禮年五十七卒其文筆數

十篇行於世

晉書

陸煜字士光瑁孫父英高平相員外散騎常侍煜少有雅望從兄機每稱之曰我家世不乏公矣元帝初鎮江左辟爲祭酒尋補振威將軍義興太守以疾不拜豫討華軼功封平望亭侯累遷散騎常侍本郡大中正太興元年遷太子詹事時帝以侍中皆北士宜兼用南人煜以清貞著稱遂拜侍中徙尙書領州大中正明帝卽位轉光祿勳遷太常代紀瞻爲尙書左僕射領太子少傅加

金紫光祿大夫代卞壹爲領軍將軍以平錢鳳功進爵
江陵伯帝不豫煜與王導卞壹庾亮溫嶠郗鑒並受顧
命輔皇太子更入殿將兵直宿錄尚書事加散騎常侍
成帝踐阼拜左光祿大夫開府儀同三司給親兵百人
常侍如故蘇峻之難隨帝在石頭舉動方正不以凶威
變節峻以煜吳士之望不敢加害峻平加衛將軍給千
兵百騎進爵爲公封次子假新康子咸和中求歸鄉里
卒年七十四追贈侍中車騎大將軍諡曰穆子湛散騎

常侍

晉書

陸退字黎民凱從孫也祖仰吏部郎父某州主簿退爲謝

安主簿嘗問張憑作母誄而不作父誄退答曰丈夫之德表於事行婦人之美非誄不顯退憑之壻也仕至光

祿大夫

晉書

陸監字始明少而隱靜方直抗烈除後將軍司馬以功封

西陽亭侯

晉書

陸景文字叔辯初爲安吉令遷太守卒

雲間志

宋

顧覲之字偉仁高祖謙晉平原內史陸機姊夫覲之初爲郡主簿謝晦爲荊州以爲南蠻功曹仍爲晦衛軍參軍晦愛其雅素深相知待王宏辟爲揚州主簿仍爲衛軍

參軍復爲衡陽王義季右軍主簿遷尙書都官郎護軍
司馬時彭城王義康秉權殷劉之隙已著覲之不欲與
殷景仁久接事乃辭腳疾免歸義康徙廢爲山陰令山
陰民戶三萬海內劇邑前後官長晝夜不得休事猶不
舉覲之理繁以約縣用無事晝日垂簾門階閒寂自宋
世爲山陰務簡而績修莫能尙也累遷尙書吏部郎世
祖卽位遷御史中丞孝建元年出爲義陽王昶東中郎
長史寧朔將軍行會稽郡事尋徵爲右衛將軍領本邑
中正明年出爲湘州刺史大明元年徵守度支尙書領
本州中正轉吏部尙書尋加左軍將軍出爲吳郡太守

八年復爲吏部尙書加給事中未拜還爲吳郡太守幸
臣戴法興權傾人主覲之未嘗降意世祖晏駕法興以
覲之爲光祿大夫覲之家尋陽尋陽王子房欲加以位
號不受東土旣平以爲左將軍吳郡太守加散騎常侍
泰始二年復爲湘州刺史常侍將軍如故三年卒時年
七十六追贈鎮軍將軍常侍刺史如故諡曰簡子覲之
家門雍睦爲州鄉所重五子約緝綽續緝綽私財甚豐
鄉里士庶多負其責覲之每禁之不能止及爲吳郡誘
綽曰我常不許女出責定思貧薄亦不可居民閒與汝
文關有幾許不盡及我在郡爲汝督之將來豈可得凡

諸券書皆何在綽大喜悉出諸文券一大廚與覲之覲之悉焚燒宣語遠近負三郎責皆不須還凡券書悉燒之矣綽懊歎彌日覲之常謂秉命有定分非智力所移唯應恭己守道信天任運而聞者不達妄求僥倖徒虧雅道無關得喪乃以其意命弟子愿著定命論

郭志名臣

愿字子恭父淵之散騎侍郎愿好學有文辭於世大明中舉秀才對策稱旨擢爲著作佐郎太子舍人早卒

宋書

本傳

陸子真晉太尉玩之曾孫也自玩至子真父萬載世爲侍中子真兄仲元又爲侍中時人力之金張二族子真仕

宋爲海陵太守時中書舍人秋當親幸家在海陵假還
葬父子真不與相聞當請發人修橋又以妨農不許彭
城王義康聞而賞之自臨海太守眼疾歸爲中散大夫

卒

宋書

顧惠允宋鎮軍將軍覲之弟子也閒居養志不應徵聘

南齊書

顧歡傳

南齊

陸慧曉字叔明子真子清介正立不雜交游初歷諸府參
軍以母老還家侍養十餘年不仕齊高祖輔政除尙書
殿中郎引爲太傅東閣祭酒建元初遷太子洗馬歷諸

王長史治身清肅僚佐以下造詣必起送之或謂慧曉曰長史貴重不宜妄自謙屈答曰我性惡人無禮不容不以禮處人未嘗卿士大夫或問其故慧曉曰貴人不可卿而賤者可卿人生何容立輕重於懷抱終身常呼人位建武初遷吏部郎尚書令王宴選門生補內外要局慧曉用數人而止宴恨之送女妓一人欲與申好慧曉不納吏曹都令史歷政以來諮執選事慧曉任己獨行未嘗與語帝遣左右單景儒以事譙問慧曉曰六十之年不復能諮都令史爲吏部郎也上若謂身不堪便當拂衣而退帝甚憚之後歷東海太守入爲五兵尚書

終南兖州刺史贈太常兄子閑字遐業仕至揚州別駕
永元末始安王遙光作亂閑以綱佐被收遇害閑四子
厥絳完襄厥字韓卿好屬文州舉秀才閑被誅厥坐繫
尚方尋有赦厥感慟而卒年二十八有文集行於世絳
字魏卿閑遇害時抱頸求代死不獲遂以身蔽刃行刑
者俱殺之襄自有傳

南齊書

顧憲之字士思未弱冠州辟議曹從事舉秀才累遷太子
舍人尚書比部郎撫軍主簿元徽中爲建康令時有盜
牛者被主所認盜者亦稱己牛二家辭證等前後莫能
決憲之至覆其狀乃令解牛任其所去牛徑還本主宅

盜者始服權要請託長吏貪殘據法直繩無所阿縱性
清儉彊力爲政甚得民和京師飲酒者得醇旨輒號爲
顧建康言清且美焉齊高帝執政以爲驃騎錄事參軍
遷太尉西曹掾帝卽位除衡陽內史先是郡境連歲疾
疫死者大半棺木尤貴悉裹以葦席棄之路旁憲之下
車分告屬縣求其親黨悉令殯葬其家人絕滅者爲出
公祿使綱紀營護之又土俗山民有病輒云先人爲禍
皆開冢剖棺水洗枯骨名爲除祟憲之曉喻爲陳生死
之別事不相由風俗遂改時刺史王奐新至惟衡陽獨
無訟者乃歎曰顧衡陽之化至矣若九郡率然吾將何

事還爲太尉從事中郎出爲東中郎長史行會稽郡事
山陰人呂文度有寵於齊武帝於餘姚立邸頗縱橫憲
之至郡卽表除之文度後還葬母郡縣爭赴弔憲之不
與相聞文度銜之卒不能傷也遷南中郎巴陵王長史
加建威將軍行婺州事時司徒竟陵王於宣城臨成定
陵三縣界立屯封山澤數百里禁民樵采憲之固陳不
可言甚切直王答之曰非君無以聞此德音卽命無禁
遷給事黃門侍郎兼尙書吏部郎中宋世其祖覲之嘗
爲吏部庭植嘉樹謂人曰吾爲憲之種耳至是果爲此
職出爲征魯長史行南兖州事遭母憂服闋建武中復

除給事黃門侍郎領步兵校尉未拜仍遷太子中庶子
領吳邑中正出爲寧朔將軍臨川內史未赴改授輔國
將軍晉陵太守頃之遇疾陳解還鄉里永元初徵爲廷
尉不拜除豫章太守有貞婦萬晞者少孀居無子事舅
姑尤孝父母欲奪而嫁之誓死不許憲之賜以束帛表
其節義中興二年義師平建康高祖爲揚州牧徵憲之
爲別駕從事史比至高祖已受禪憲之風疾漸篤固求
還吳天監二年就家授大中大夫憲之雖累經宰郡資
無儋石及歸不免飢寒八年卒於家年七十四臨終爲
制以敕其子所著詩賦銘讚并衡陽郡記數十篇

梁書

梁

陸倕字佐公慧曉子少勤學善屬文於宅內起兩茅屋杜絕往來晝夜讀書嘗借人漢書失五行志四卷乃暗寫還之略無遺脫天監初爲右軍安成王外兵參軍轉主簿倕與樂安任昉友善爲感知己賦以贈昉昉因此名以報之遷驃騎臨川王東曹掾是時禮樂制度多所創革高祖雅愛倕才乃敕撰新漏刻銘遷太子舍人管東宮書記又詔爲石闕銘敕褒美之賜絹三十四匹歷遷太常卿普通七年卒文集二十卷行世子纘十歲通經爲童子郎卒次纘有似於倕一看殆不能別

梁書

陸雲公字子龍父完位寧遠長史瑯邪彭城二郡丞雲公
五歲誦論語毛詩九歲讀漢書略能記憶從祖倕與沛
國劉顯質問十字雲公對無所失顯歎異之及長好學
有才思爲湘東王繹行參軍雲公先製太伯廟碑吳興
太守張纘罷郡經途讀其文歎曰今之蔡伯喈也纘至
都掌選言之武帝召爲尚書議曹郎入直壽光省以本
官知著作郎事累遷中書黃門郎兼掌著作雲公善奕
碁嘗夜侍坐冠觸燭火帝笑謂曰燭燒卿貂帝將用爲
侍中故以此戲之時天泉池新製鰩魚舟形陋而短帝
暇日常汎此舟朝中唯引太常劉之遴國子祭酒到旣

右衛朱異雲公時年位尙輕亦與焉太清元年卒張纘
時爲湘州與雲公叔襄兄晏子書曰都信至承示賢兄
子賢弟黃門殞逝非唯貴門喪寶實有識同悲其爲士
流稱重如此雲公從父兄才子亦有才名位太子中庶
子廷尉與雲公並有文集行於世

南史

陸襄字師卿厥之弟天監三年范岫表薦起家著作佐郎
昭明太子聞襄業行啓武帝引與游處除太子洗馬遷
中舍人並掌管記出爲揚州中從事以父終此官固辭
武帝不許聽與府司馬換廨居之後爲太子家令母憂
去職年已五十毀頓過禮大通七年爲鄱陽內史大同

元年郡人鮮于琮殺廣晉令王筠將出攻郡襄先率人吏爲備賊至破之生獲琮時鄰郡案黨與皆不得實惟襄枉直無濫在政六年郡中大寧太清元年爲度支尚書侯景反還吳義兵推襄行郡事遣兄子映公帥衆與景將宋子仙戰敗走襄匿墓下憂憤卒元帝贈侍中追封餘干縣侯

梁書

陳

陸繕字士縉倕兄子也幼有志尚以雅正知名武帝作輔爲司徒右長史及受命位侍中出爲新安太守文帝嗣位徵爲中庶子領步兵校尉掌東宮管記繕儀表端麗

進退閒雅文帝使太子諸王咸取則焉大建中歷度支
尚書侍中太子詹事尚書左僕射參掌選事別敕與徐
陵等七人參議政事卒贈特進諡曰安子

陳書

顧野王字希馮吳郡吳人也祖子喬梁東中郎武陵王府
參軍事父烜信威臨賀王記室兼本郡五官掾以儒術
知名野王幼好學七歲讀五經略知大旨九歲能屬文
嘗製日賦領軍朱异見而奇之年十二隨父之建安撰
建安地記二篇長而徧觀經史精記默識天文地理著
龜占候蟲篆奇字無所不通梁大同四年除太學博士
遷中領軍臨賀王府記室參軍宣城王爲揚州刺史野

王及瑯邪王褒竝爲賓客王甚愛其才野王又好丹青
王於東府起齋乃令野王畫古賢命王褒書贊時人稱
爲二絕及侯景亂野王丁父憂歸本郡乃召募鄉黨數
百人隨義軍援京邑野王體素清羸裁長六尺又居喪
過毀殆不勝衣及杖戈被甲陳君臣之義逆順之理抗
辭作色見者莫不壯之京城陷野王逃會稽尋往東陽
與劉歸義合軍據城拒賊侯景平太尉王僧辨深嘉之
使監海鹽縣高祖作宰爲金威將軍安東臨川王府記
室參軍尋轉府諮議參軍天嘉元年敕補撰史學士加
招遠將軍光大元年除鎮東都陽王諮議參軍太建二

年遷國子博士後主在東宮野王兼東宮管記本官如故六年除太子率更令尋領大著作掌國史知梁史事兼東宮通事舍人時宮僚有濟陽江總吳國陸瓊北地傅綽吳興姚察竝以才學顯著論者推重焉遷黃門侍郎光祿卿知五禮事餘官竝如故十三年卒時年六十三詔贈祕書監至德二年又贈右衛將軍野王少以篤學至性知名在朝無過辭失色觀其容貌似不能言及其勵精力行皆人所莫及第三弟充國早卒野王撫養孤幼恩義甚厚著玉篇三十卷輿地志三十卷符瑞圖十卷顧氏譜傳十卷分野樞要一卷續洞冥記一卷元

象表一卷竝行於世又撰通史要略一百卷國史紀傳二百卷未就而卒有文集二十卷孫道行在唐自有傳

郭志
名臣

陸瓊字伯玉襄兄完之孫也幼聰慧號神童從祖襲歎曰此兒必荷門基所謂一不爲少天嘉中以文學累遷尚書殿中郎深爲文帝所賞遷新安王文學掌東宮管記太建中爲給事黃門侍郎轉中庶子領大著作撰國史至德元年除度支尚書初瓊父雲公奉梁武敕撰嘉瑞記瓊述其旨而續焉自永定訖於至德勒成一家之言遷吏部尚書號爲稱職瓊性謙儉不自封殖雖位望日

隆而執志愈下丁母憂哀慕過毀卒有集二十卷行於

世

陳書

陸炎字溫玉瓊從父弟父令公梁中軍宣城王記室參軍
溫玉幼孤好學有志操州舉秀才累遷始興王外兵參
軍直嘉德殿學士陳文帝聽覽餘暇頗留心書籍以溫
玉博學善占誦引置左右嘗使製刀銘援筆卽成無所
點竄帝嗟賞久之賜衣一襲俄兼通直散騎常侍副郢
邪王厚聘齊至鄴厚病卒溫玉爲使主時年二十餘風
神韶亮占對閒敏齊士大夫甚傾心焉太建初爲武陵
王明威府功曹史兼東宮管記丁母憂去官卒至德二

年追贈司農卿所製文辭多不存本後主求其遺文撰

成二卷

南史

陸瑜字幹玉溫玉弟少篤學美辭藻州舉秀才再遷軍師
晉安王外兵參軍東宮學士溫玉時爲管記竝以才學
娛侍左右時人方之二應太建中累遷太子洗馬中舍
人瑜聰敏強記嘗受莊老於汝南周宏正學成質論於
僧滔法師竝通大旨時皇太子好學欲博覽羣書以子
集繁多命瑜鈔撰未就而卒太子爲之流涕親製祭文
仍與江總論述其美至德二年追贈光祿卿有集十卷
瑜從父兄玠從父弟琛玠字潤玉梁大匠卿晏子之子

宏雅有識度好學能屬文後主在東宮徵爲管記仍除
中舍人以疾失明還鄉里卒贈少府卿琛字潔玉臨川
王長史邱公之子少警俊事後母以孝聞後主嗣位爲
給事黃門郎中書舍人

南史

隋

陸士季父慶梁時爲婁縣令士季從同郡顧野王學左氏
春秋司馬史班氏漢書仕隋爲越王侗記室兼侍讀侗
稱制擢著作郎時王世充將篡逆侗謂士季曰隋有天
下三十年朝果無忠臣乎士季對曰見危授命臣宿志
也請因啓事爲陛下殺之謀洩不克入唐終太學博士

兼宏文館學士

隋書

褚輝字高明吳郡人以三禮學稱於江南煬帝時徵天下
儒術之士悉集內史省相次講論輝博辯無能屈者由
是擢爲太學博士撰禮疏一百卷

隋書

松江府志卷四十九終

松江府志卷五十

古今人傳二

唐

陸元感字達禮士季孫也父謀道周王府文學詳正殿學士善班固漢書元感生而敏慧傳其家學解褐參韓王府軍事除婺州龍邱丞遷建德歷陽二縣令咸有善政加朝散大夫護軍行黃州司馬

唐書

顧道衍字正平野王之孫開元中舉進士又登文學優贍科仕爲湖州司功參軍廉平惠愛獄簡訟息民稱焉後

棄官歸吳築室奉母

陳志賢達

陸南金士季孫元感子貞觀中爲太常奉禮郎歷鄞令築隄爲湖千頃開元初少卿盧崇道抵罪徙嶺南逃還東都南金居母喪崇道僞稱弔客突入南金舍而道其情南金匿之事覺詔御史捕按南金當重法弟趙璧自言匿崇道者我也請死南金固言弟自誣不情御史怪之趙璧曰母未葬妹未歸兄能辦之我生無益不如死御史驚上狀帝遂皆宥之南金知書史操履謹飭張說陸象先稱其賢授庫部員外郎以痼疾改太子洗馬卒唐書陸贄字敬輿嘉興人父侃爲溧陽令十八登進士第中博學宏辭調鄭尉罷秩東歸省母路由壽州刺史張鑑有

重名贊往見語三日奇之請爲忘年交旣行餉錢百萬
曰請爲母夫人一日費贊不納止受茶一串而已又以
書判拔萃補渭南尉德宗立遣黜陟使行天下贊說使
者請以五術省風俗八計聽吏治三科登俊又四賦經
財實六德保疲瘵五要簡官事時皆聽其言遷監察御
史召爲翰林學士會馬燧討賊河北久不快請濟師李
希烈寇襄城詔問贊策帝不納從狩奉天機務闌總遠
近調發奏請報下詔書數百贊若不經思逮成皆周盡
事情衍繹熟復人人可曉旁吏承寫不給他學士筆閣
不得下而贊沛然有餘始帝播遷府藏委棄衛兵無褚

衣至是天下貢奉稍至乃於行在夾廡署瓊林大盈二庫別藏貢物贊上疏諫帝悟卽撤其署遷諫議大夫仍爲學士孤立爲左右權幸沮短又言事無所回諱陰失帝意久之不得宰相但爲中書舍人母韋猶在江東帝遣中人迎還京師俄以喪解官客東都諸方賄遺一不取唯韋皋以布衣交先以聞故所致皆稱詔受之又詔中人護父柩自吳葬洛陽服除權知兵部侍郎復召爲學士眷遇彌渥天下屬以爲相而竇參素不平忌之贊亦數言參罪失貞元七年罷學士以兵部侍郎知貢舉明年參黜乃以中書侍郎同中書門下平章事班宏判

度支卒贊薦李弼帝自用裴延齡贊言延齡僻戾躁妄不可用不聽俄而延齡姦佞得君天下仇惡無敢言贊上書苦諫帝不憚竟以太子賓客罷贊本畏愼未嘗通賓客延齡揣帝意薄譏短百緒帝怒欲誅贊賴陽城等交章論辯乃貶忠州別駕後稍思之會薛延爲刺史論旨慰勞章舉數表請贊代領劍南帝猶銜之不冒與順宗立召未至卒年五十二贈兵部尚書諡曰宣始贊入翰林年尙少以材幸天子常以輩行呼而不名在奉天朝夕進見然小心謹慎未嘗有過由是帝親倚至解衣衣之同類莫敢望雖外有宰相主大議而贊嘗居中參

裁可否時號內相嘗爲帝言今盜徧天下宜痛自咎悔以感人心昔成湯罪己以興楚昭出奔以一言善而復國陛下誠不吝改過以言謝天下使臣持筆亡所忌庶叛者革心帝從之故奉天所下制書雖武人悍卒無不感動流涕後李抱眞入朝爲帝言陛下在奉天山南時敕令至山東士卒聞者皆感泣思奮臣是時知賊不足平也議者謂興元戡難雖爪牙宣力贊與有功焉其從狩山南也道險澀與從官相失夜召贊不得帝驚且泣詔軍中得贊者賞千金久之上謁帝喜見顏閒自太子以下皆賀及輔政不敢自願重事有可否必言之所言

皆拂帝短想，到深切或規其太過者曰：吾上不負天子，下不負所學而已。皇它卹乎？旣放荒遠，嘗閭戶人不識其面，又避謗不著書。地苦瘴癘，祇爲古今集驗方五十篇，示鄉人。云子簡禮登進士第，累辟使府。新舊唐書按：顧志宜公父，肅未知何據，今依本傳。

陸明允字信夫，贊從子。元和三年，以集賢校理出爲奉化令。悃悃無華視，民如子。屬歲大旱，鄰境人相食，明允輯和其民，振廩食以餓餒者，全活數萬人。治行爲天下第一。復於龍潭溪壘石障水，鑿引流下通廣平湖，達於江。慨田數千頃，後名其堰曰資國渠，曰新河。至今賴之在。

邑五年卒

陳志
賢達

顧謙字自修其先吳郡人丞相季歷之後風神朗秀質性
端敏舉明經三禮二科洞達貫穿魏帥何公表謙高才
拜貝州宗城令尋棄歸隱居北平鄉崧子里名流高其
風操成就見焉咸通某年卒

顧志
名臣

丁公著字平子居胥浦祖哀父緒皆不仕三歲喪母七歲
見鄰母抱其子哀感不食年二十一五經及第明年又
舉開元禮授集賢校書郎秩未終歸侍鄉里不應請辟
居父喪躬負土成墳貌力癯瘠見者憂其死孝觀察使
薛華表聞詔賜粟帛旌其門淮南節度使李吉甫慕其

才行薦授太子文學兼集賢殿校理吉甫自淮南入相
廷薦其行卽日授右補闕遷集賢直學士尋授水部員
外郎充皇太子及諸王侍讀著皇太子及諸王訓十卷
轉駕部員外仍兼舊職穆宗卽位未及聽政召居禁中
詢訪朝典以宰相許之公著陳情詞意極切超授給事
中賜紫金魚袋未幾遷工部侍郎仍兼集賢殿學士知
吏部選事公著知將大用以疾辭退不許因求外官遂
授浙江西道都團練觀察使二年授河南尹皆以清靜
爲理改尙書右丞轉兵部吏部侍郎遷禮部尙書翰林
侍講學士上以浙西災寇詢求良帥命檢校戶部尙書

領之詔賜米七萬石以賑給浙民賴之改授太常卿以疾請歸鄉里未至而終年六十四著禮志十卷

陳志賢達

陸曇不知其人五茸志逸載其墓碑文曰陸處士曇字文廣其先吳郡人也幼承嚴訓長有令望風義洋洋遠近欽囑經學至美筆法尤精不仕明時邱園樂道禍不讓善殲於哲人以開成元年寢疾至二年丁巳歲莫春之

月四日終於私第春秋五十有二

志石今在張擇種福庵中

陸展字祥文曾祖禮殿中侍御史祖師德淮南觀察支使父鄩陝州法曹參軍徙家於陝遂爲陝人展本名允迪光啓二年僖宗在興元舉進士第一進翰林學士中書

舍人屬辭敏速若注射然一時書命同僚以爲不及昭宗嘗於金鑿作賦詔學士皆和展先就帝歎曰貞元時陸贄吳通元善內廷文字後無繼者今朕得卿斯文不墜矣與宗人希載文才重德名冠一時朝中號二陸累爲尙書左丞封嘉興縣男徙戶部侍郎貶峽州刺史久之授工部尙書從帝自華州還以工部尙書當國封郡公天復初朱全忠謀去朝廷衣冠貶展懷州司戶殺之於白馬驛年五十九

願志名臣

宋

董父字彥臣治平二年進士官魏王宮教授遷大理寺

卿進樂書釋青囊經遷朝議大夫敷文閣待制封華亭縣開國男哲宗敕云典教王宮有忠孝勉旃之意司刑大理極寬恤剖決之仁累賜劄問且題門版云數封天子詔兩代帝王師後自華亭徙德興

饒州府志

戴顯甫嘉興人嘉祐八年進士選亳州永城尉與舅氏杭州陶叔獻同舉進士陶登第纔旬月卒於京師顯甫扶舅喪歸葬舅妉攜子女還外家其母孫無所依迎養於

家

浙江通志

衛公佐字輔之其先汲縣人徙居華亭祖至有文行舉進士公佐被恩命授將仕郎官揚州助教母郁早卒事繼

母陳盡孝族有貧不能嫁女者雖疏遠必爲擇壻歸之聚書數千卷禮四方賢士教訓子弟時縣未有學捐地爲址又獨任禮殿之役熙寧末饑疫乃施粥給藥請邑僧靈敏輩分拯之瘞殍給棺無慮數萬邑大夫嘉其義將奏言之公佐辭曰某占籍上等恐爲盛德累療病送死僧行頗有力請以薦僧大夫義而從之元豐中復饑租稅無所出舊令秩滿代者已至轉運使苛留之使督逋負累繫盈庭又爲出粟代輸釋繫者而舊令始得解去民相與踵門謝曰微君吾屬將死於縲紲矣年五十八無疾而卒前一日展先塋且徧謁親舊若與之訣者

歸語家人曰我生樂善好施不爲不義今也云亡可無憾矣弟公亮公望竝敦行義其後子孫蕃盛終宋世膚敏仲達文節皆其後

顧志節義

陳舜俞字令舉博學強記舉進士又舉制科第一熙寧三年以屯田員外郎知山陰縣詔俟代還試館職舜俞辭曰爵祿名器砥礪多士宜示以至公烏可爲期如付劑契繳中書帖上之青苗法行舜俞不奉令上疏自劾其略曰天下之有常平非能人人計口授餉但權穀價賤之柄使積貯者不得深藏以邀利爾今散爲青苗惟恐不盡萬一饑饉洊至必有乘時貴糶者將何法以制

之官制既放錢取息富室藏鏹坐待鄰里逋欠之時田宅妻孥隨欲而得豈不爲兼并利哉且使吾民歲輸息錢是別爲一賦以敝海內非王道之舉也奏上責監南康軍鹽酒稅五年而卒舜俞本家烏程自中年棄官歸居於郡之白牛村自號白牛居士蘇軾稱其學術才能兼百人之器著有都官集

通志參修錄
御先賢錄

章粹字仲容元豐時通判恩州百廢具舉適河流湍溢州人大恐粹增卑培薄迄以無虞樞密鄭居中疏薦之東

通志

呂全嘉祐二年進士知臨海縣以政績聞時民役至七年

始更全隨產高下爲久近民便之

赤城志參
浙江通志

呂益柔字文剛別號松澤叟元祐三年進士官刑部侍郎

以朝議大夫顯謨閣待制致仕嘗撰妙悟大師碑銘書

船子和尙撥櫂歌重於時

宋碑

朱之純登元祐進士第以文名於時歸老西湖作湖齋谷

陽園自號谷陽先生

顧志
文學

朱諤字聖與初名紱舉進士第二調忠正軍推官崇寧間

歷遷侍御史給事中以同黨籍人姓名改今名進御史

中丞嘗奏請開內閣延羣臣從容論治道如神宗故事

又請分命使者刺舉諸道有受令不行行而不盡者論

其罪則令出而朝廷尊俄兼侍讀徒兵禮吏三部尙書

大觀元年拜尙書右丞卒贈光祿大夫諡忠靖

宋史

衛膚敏字商彥以上舍生登宣和元年進士第授文林郎
南京宗子博士尋改教授六年召對改宣教郎祕書省
校書郎命假給事中賀金主生辰膚敏奏曰彼生辰後
天寧節五日金人未聞入賀而反先之失國體萬一金
使不來爲朝廷羞請至燕山候之彼若不來則以幣置
境上而已帝可其奏旣至燕金賀使果不至遂置幣而
返七年復假給事中以行及慶源府逢許元宗還語金
國事曰彼且大入其勢不可往膚敏至燕報愈急衆懼

不敢進膚敏叱曰吾將君命以行其可止乎既至金國知其兵已舉殊不爲屈及將還金人所答國書欲以押字代璽膚敏力爭曰押字豈所以交鄰國論難往復卒易以璽及受書欲令雙跪膚敏曰雙跪乃北朝禮安可令南朝人行之哉爭辨踰時卒單跪以受金人積不說中道羈留且半年至涿州新城與韓離不遇遣人相約見拒之不可遂語之曰必欲相見其禮當如何曰有例膚敏笑曰例謂趨伏羅拜此禮焉可用北朝止一君耳皇子郎君雖貴人臣也一介之使雖賤亦人臣也兩國之臣相見而用君臣之禮是北朝一國有二君也金人

氣折始曰惟所欲膚敏長揖而入既坐金人出誓書示之膚敏卻不視曰遠使久不聞朝廷事此書真偽不可知因論用兵事又以語折之幾復爲所留靖康初始還進三官遷吏部員外郎會高麗遣使來賀命假太常少卿往接之朝論欲改稱宣問使膚敏曰國家厚遇高麗久矣今邊事方作不可遽削其禮失遠人心願姑仍舊乃復稱接伴使既至明州會京師多難乃便宜稱詔厚賜使者遣還建炎元年復命自劾矯制之罪高宗嘉賞選衛尉少卿建議兩河諸郡宜降蠟書許以世襲使各堅守陝西山東淮南諸路竝令增陴濬隍徙民入城爲

清野計命大臣留守汴京車駕早幸江寧帝頗納之遷起居舍人拜右諫議大夫兼侍讀上言行在頗興土木非所以示四方乞罷築承慶院昇陽宮又奏凡黜陟自中出者皆由三省乃得奉行或戾祖宗成憲者皆許執奏時內侍李志道以赦恩復保慶軍承宣使添差入內都知膚敏極論罷之初欽宗內侍昭慶軍承宣使容機圍城時乞致仕高宗卽位命起之膚敏言自古帝王未有求闈寺於閒退而用者遂寢后父邢煥除徽猷閣待制太后兄子孟忠厚顯謨閣直學士膚敏言非祖宗法煥尋換武職忠厚自若俄遷膚敏中書舍人膚敏懇奏

曰昔司馬光論張方平不當參知政事自御史中丞遷翰林學士光言以臣爲是則方平當罷以臣爲非則臣當貶今兩無所問而遷臣臣所未喻臣雖不肖願附於司馬光又言事母后莫若孝待戚屬莫若恩勸臣下莫若賞今陛下順太母以非法非所謂孝處忠厚以非分非所謂恩不用臣言而遷其官非所謂賞一舉而三失矣帝命宰相諭膚敏曰朝廷以次遷官非因論事也膚敏猶不拜居家逾月及忠厚改承宣使詔后族勿除從官膚敏始拜命又言中書根本之地舍人所掌不特演綸而已凡命令不合公議者率封還之會膚敏知貢舉

有進士何烈對省試策謬稱臣諫官李處遜乞正考官
鹵莽之罪以集英殿修撰提舉洞霄宮或謂膚敏在省
論事爲黃潛善汪伯彥所惡故因事斥之三年春召赴
行在時帝次平江膚敏入見言及時事泣下帝亦泣曰
卿今直知無不言有請不以時對膚敏曰臣頃嘗三爲
陛下言揚州非駐蹕之地乞早幸江寧今錢塘亦非帝
王之都宜須事定亟還金陵因陳所以守長江之策帝
善其言翼日再對歸得疾然猶力疾扈蹕至臨安俄除
刑部侍郎未拜謁告歸華亭就醫許之遷禮部侍郎初
膚敏久疾臥舟中不能朝時苗劉之變帝未反正宰相

朱勝非言於隆祐太后以庸敏稱疾坐觀成敗無人臣節及卒始明其非僞云年四十九特贈大中大夫子仲

英仲傑仲循

宋史

朱彥美字師實知仁和縣姦頑斂迹凡徵租不遣一吏大署其門予之期趨令無一人後者除通判杭州守將悉以事委彥美每夜漏欲盡起秉兩炬據案閱訟牒數千百人立盡一郡稱治嘗陳便宜十餘條徽宗召見賜五品服除江淮荆湖兩浙等路制置發運判官先是蔡京用事罷轉般倉爲直達倉盡抬藏錢廩粟爲羨餘以獻而六路漕船浮江絕淮汴累數月而後至吏卒冗食

其中度不能償則欠而沈之以險爲解或委空舟逃去
歲亡十二三中都藏粟且盡彥美受命曰此直達之誤
也今轉般倉法具載有司第付推行乃攷故事著科條
蒐獮脫遺鉏治乾沒得緡錢累百萬宣和二年除京西
轉運副使諸郡漕錢不輸於庫者八十萬往往懼罪自
匿彥美飭錢所過州縣隨所見存者受之不幸而廢於
水火盜賊者聽吾命於是送吏歡呼奔走徵逋償償之
盡輸所謂八十萬者又京西介居國右守將類多顯人
怙貴不法至輦金幣署別籍儲之部使者無敢誰何而
河防陵寢視他路爲劇每可請於朝或移用他司錢佐

其乏而以負殿免者相屬彥美乘傳詣所屬州按簿書窮株穴得百餘萬釋逋負之在繫者量緩急輕重所宜爲施舍費出之節於是上下贍足奏課爲天下第一五年進直祕閣遂請老卒年八十

陳志
賢達

柳約字元禮大觀三年以上舍第進士爲霸州教授徙睦州入爲辟雍正遷博士改宣議郎充廣親宅宗子博士約深於經學屬辭粹美大爲學者師慕提舉福建鹽事召對乞罷內外官到堂日投牒求官以厚風俗授祕書省校書郎進著作佐郎徽州司錄改通判宿州召拜監察御史靖康初兼權殿中侍御史論三鎮不可棄改尙

書工部員外郎進左司員外郎父憂去官服除以直顯謨閣充御營司參謀官遷太常少卿高宗將幸平江約疏言兵可進毋退以示怯於敵乃以直龍圖閣知台州未赴徙嚴州兼浙西兵馬都監節制管內軍馬當是時金人大入杜充擁衆北去列郡震恐莫有奔問官守者約於橫潰中屹保孤城悉力捍禦境內安堵慨然上書請糾合諸郡克復吳會上嘉其忠進右文殿修撰守郡如故詔以軍興費出無藝吏慢弗虔柳約獨謹賦輸率先程督進秩一等又詔約郡當兵衝而能不辭難不避事益嚴列柵保綏一方朕甚嘉之其以約充集英殿修

撰召入對獎勞再三擢權戶部侍郎約感激益盡言凡
例外宣索皆執奏不進論吳开等罪未正非所以厲臣
節諸大將提兵入覲各名其家將有尾大不掉之患皆
人不敢言者又言軍興科需百出請令官戶名田過制
者與編戶均一科輸請增諸路酒錢其半令提刑司椿
管以備軍費皆從之會高麗請修貢議遣使報聘上顧
廷臣無出約右加試戶部侍郎充其選行大用當路忌
之諷言者誣以事罷爲提舉太平觀居七年復祕閣修
撰金人歸侵疆起知蔡州被命而往一無顧避旣而金
人渝平傳檄河南守臣皆舉城降約獨遣使數輩於武

自得報而後返未幾以敷文閣待制食祠祿十有五年卒贈四官約天性至孝母病甚泣禱於天願損壽以益親壽母尋愈約竟先母兩月卒

宋史

衛仲達初名上達字達可大觀三年登進士第徽宗改今名爲館職日嘗上書諫修三山石橋不報後官至吏部

尙書卒

至元嘉禾志
參顧志名臣

任盡言字元受右正言伯雨之孫與兄質言同登紹興二年進士第居下僚好慷慨論事秦檜死朝廷徵言路墜塞之弊召湯鵬舉於外爲臺官盡言投啓賀之有每愧朱雲之請劍未聞林甫之斲棺云云鵬舉袖以白上上

意頗同始黜檜姻黨釋趙鼎子汾及李孟堅王之奇等
自便公道大彰盡言之力也通判平江除京西運判改
淮東提舉欽廟上升盡言率搢紳爲位佛宮哭臨疏文
二通讀者感泣啓與疏岳珂皆載之程史謂其義不忘
君直不蔽姦忠信之至惜不究其用云著小醜集

顧志名臣

張伯垓佚其字登紹興第官至尙書

顧志名臣

潘緯字仲寶一字景緯紹興十五年進士恬於進取乾道
中教授安慶軍書撰柳文音義吳郡陸之淵序之

顧志文學

陳伯達與潘緯同榜進士其學深於經術尤於洪範有心

得通

志

姚述堯字進道紹興二十四年第進士未冠讀書蕭寺日
買二蒸餅日且予童僕人問之曰夜讀毋恐飢令食蒸
餅縱不飢敢忘母命乎與張橫浦九成施彥執德操葉
先覺某同志契合橫浦有詩云環顧天地閒四海惟三
友謂彥執先覺述堯也著有蕭臺公餘詞一卷 金山志按宋
林景祥雲間進士題名碑於是科祇載錢良臣徐銳衛
稷三人無述堯雲間志進士題名亦同金山志所載未
知何據

錢良臣字友魏紹興二十四年進士淳熙五年繇給事中
除端明殿學士簽書樞密院復除參知政事德望端偉
爲時所重九年罷政事除資政殿學士奉祠尋知鎮江

府職事修舉又除端明殿學士改知建康府兼行宮留
守拜資政殿大學士二十五年請罷提舉洞霄宮光宗
時卒諡文惠孝宗嘗詢時事所陳合上意孝宗褒之曰
如卿真所謂通世務之儒遂書通儒賜之

通志參願
志名臣

許克昌字上達紹興三十年舉進士名在第一以有官改
第二累官右正言時松江新涇塘爲海潮衝突鹹水內
灌羣及嘉湖二境克昌請於朝移堰入運港以避潮勢
由是三州之田獲免鹹潮之患鄉邦德之

願志
名臣

朱端常父繹之字貴言乾道二年進士知常州端常博雅
能文登淳熙八年進士第嘉定閒知延平州政尙寬和

祀延平名宦又與同郡胡林卿林至同修雲間志歷官

尚書

陳志
賢達

蓋經字德常高宗紹興間由舍選登甲科官至中大夫戶

部侍郎

至元嘉
禾志

衛涇字清叔其先齊人唐末避亂南遷居秀州之華亭祖

闡政和八年進士父季敏通判鎮江府涇少有志操從

永嘉李去智學李卒爲制服執喪人咸義之淳熙十一

年擢進士第一授承事郎添差鎮東軍簽判涇以對策

嘗陳添差之弊上表乞待次上特從其請故事狀元初

任垂滿必通謝宰執始頗召命時正淮秉政涇不通謝

被召三月不得見十四年除祕書省正字輪對言陛下
卽位之初銳意事功不次用將相痛憤以圖恢復二十
六年之久無一事少稱陛下意者而陛下大有爲之意
亦少弛矣一祖八宗之業太上皇付託之重子孫億萬
年之基緒陛下一身任之豈可僅取苟安無事而遂已
邪庸常之材持祿保身而風俗日壞士氣日卑民生日
困臣恐天下之患將有出於意慮之外者事幾易失時
不再來願陛下堅自強之志振綱維以張國勢作氣節
以厲儉情則靜可以彊根本動可以復土疆而事功立
矣光宗初立政尙循謹涇以著作佐郎賜對言今日風

俗頽靡百度縱弛人才削弱國勢未張汲汲有爲尙恐
不濟若猶因循其弊將至於不可爲者矣又言中國名
爲息兵實則觀釁復讎之志直須時耳今自紹興來五
十年無大戰自隆興來三十年無小鬪閒隙之生遠不
過五六年願陛下奮發英斷規恢遠圖臥薪嘗膽不忘
中原聖志先定然後與二三重臣講求大計重任而責
成之內治外備則大仇可復中興可期又言自陛下踐
祚臺諫給舍多不得其職今日士氣向衰風采銷落陛
下所當長養振作而反陰消沮之將使羣臣上懼陛下
之威命下虞羣小之中傷苟且成風諂諛充位脫有大

姦巨害誰爲陛下言者紹熙元年遷著作郎兼司封郎官二年正月震電兩霜大雪繼作涇應詔上封事言雷陽也雪陰也陽氣方升而陰制之此雪所以降也以象類而求則君欺於臣夫陵於妻小人害君子皆陰勝陽之證也有一於此皆能致亂陛下不可不豫防也時倭幸漸肆李后悍妒故涇以爲言出爲淮東浙東兩路提舉慶元初召爲尙書右司郎官論壽皇孝養禮曠以爲太上之於陛下親父子也天性之愛血氣之屬慈孝之親宜無毫髮疑閒雖太上疾勢未平語言舉動若未容於進見者然陛下孝心純篤豈以吾親之不可見而遂

已乎願陛下兢業於中以親之未順爲憂以期於見親
爲念積此誠意庶幾太上之歡心可得矣三年以起居
舍人假工部尙書使金初涇之往寧宗諭使覘覷涇懼
輕動還奏一敵滅一敵生無以金之危亡爲喜除直煥
章閣知慶元府沿海制置使以言者論罷是時權姦用
事涇斥去十年不調於里中闢西園名其堂曰後樂開
禧元年得旨入朝明年除中書舍人兼直學士院論北
伐非計不聽三年自吏部尙書拜御史中丞請誅韓侂
冑論罷右丞相陳自強拜參知政事封崑山縣開國伯
嘉定初兼太子賓客始侂冑誅涇之功居多繼又患史

彌遠有專恣之漸欲去之彌遠爲景獻舊學知涇謀風御史劾罷之五年知潭州八年知隆興府上以涇三世同居有堂曰友順御書二大字太子亦爲書後樂堂勝賜之九年知揚州十七年除資政殿學士金紫光祿大夫致仕進封吳郡開國伯寶慶二年卒理宗輟視朝一日特贈太師追封秦國公賜諡文節涇歷仕三朝出入內外四十餘年憂國忘家始終一節而謀深慮遠不徼近功其進退之際不與時升降在朝孤立自守不畏彊禦薦進搜舉汲汲如不及在潭時與朱熹交好侂冑指熹爲僞學斥之侂冑既死涇奏召熹還朝而熹已卒復

移文新安取嘉諸經四書傳注刊刻以傳又請爲右文
殿修撰張栻賜諡所著文五十卷曰後樂集弟湜字正
叔好古博學除太府寺丞將作少監皆不赴嘗集禮記
諸家傳注爲一百六十卷名曰禮記集說寶慶三年上
之終朝散大夫直寶謨閣知袁州學者稱爲櫟齋先生
顧志名臣雲間舊志衛文節公生於蕭塘今爲崇福
寺又崇福寺記云湜以故第益之然則徙於崑山僅同
寄籍而湜之生
長固在華亭矣

胡林卿淳熙十四年甲科與史彌遠同榜史後柄國勢燄
熏灼終身不登其門及卒有輓之者云有名登相榜無
迹到權門初縣未有志林卿始與知縣楊潛同邑林至

朱端常同修爲三卷號雲間志時紹熙癸丑也蒐錄事實能舉其要後郡邑志皆原於此先河之功自不可沒除迪功郎饒州州學教授子琚嘉定十三年進士學議該博能詩有靜庵集行世

郭志文苑

田疇號與齋嘗爲史彌遠客列翹材館中彌遠爲設講席於國學六館之士北面焉不仕有學易蹊徑四書說約

行於世

郭志文苑

林至字德久淳熙十六年釋褐歷官祕書省登晦庵先生之門有釋騷及文集行世子革世其學登嘉定十三年

進士

郭志文苑

景時字秀發慶元三年知龍泉縣之官日水患甫寧時撫
字催科不爲刻礮修學校建譙樓縣倉嘗曰吾於龍泉
政事無以踰人惟不擾二字始終守之

吉安志

亭百詠詩

顧志文學

高子鳳字儀甫以詩名嘗注杜詩林竹溪爲作序有文集

若干卷

郭志文苑

朱允恭字爾靖號樗齋與族人藤州守日新號足庵者竝
以詩名四靈趙天樂選允恭詩二百餘首爲集

郭志文苑

儲泳字文卿號華谷居杜浦以詩見稱雜著甚多有祛疑

說行於世弟漬字智卿號晴谷亦有詩名

志苑

衛宗武字淇父以父蔭官州守文及翁序其詩文名秋聲

集

郭志
文苑

葉汝舟字濟川登開慶元年進士有刊行通鑑筆義所著

詩文藏於家

郭志
文苑

朱樸隱居華亭自號天和子黃裳徐鐸楊傑趙挺之輩

竝有天和堂詩

雲開
志

王奎其先大名人裔出文正公旦祖述太常少卿靖康中

避難自金陵再遷華亭奎風容韻亮好爲神仙方術自

號蟾谷異士嘗著蟾谷祛疑貫靈篇行於世嘉定寶慶

開再徵不起卒之先一月獨告所知曰吾將顯化矣至

期沐浴冠裳而卒

趙松雪集

鮑廉其先浙人咸淳中知臨江軍德祐元年二月元兵渡江廉率所部迎敵於天長六合開大小百餘戰既而元兵合圍退入臨江城陷向闕泣拜遂殉節子穆景定闕中宏詞科宋亡隱居不仕

南匯志

謝國光字觀夫號節齋晉太傅安二十六世孫六世祖某隱居華亭南之立極遂爲邑人宋咸淳九年領鄉薦明年上春官以所對策剴切主司畏賈似道不敢取例補太學生宋亡遂不仕元治書侍御史程鉅夫奉詔搜賢

或以國光薦輒杜門稱疾以經史自娛至正乙酉卒遺命題其墓曰安節表其志云孫晉字彥明善醫有文行

顯志
簡義

曹澤之字仲溥號守齋其先溫州人占籍華亭家小蒸澤之在宋以長秋恩補環義郎入元授常州路儒學教授不赴生平孝友謹直篤於族里嘗宋元兵變開賴以保全者甚衆所居有堂曰樂靜故學者稱爲樂靜先生卒年八十三子應符自有傳

青志

曹應符字泰叔號梅渚謹身飭行爲鄉里推重咸淳初兩領鄉薦十年登進士第授迪功郎衢州司戶參軍會宋

亡遂隱不仕族人光遠號東洲咸淳五年進士辟監華
豐莊改軍器監簿宋亡衣冠不改人稱大頭巾相公云

順志
節義

黃裳字齊賢家世儒科爲浦城望族父辦學始居雲間裳
少孤自立操履醇正兩與鄉薦以特科授初品官調邵

武尉歷天台丞

古刻
叢鈔

陸霆龍字伯靈咸淳鄉貢進士禮記都魁宋亡卽棲隱講
授終其身衣冠不易自贊畫像云勤勤劬劬耽嗜慕悅
而不忍舍者聖賢之書越越起起畏懦退縮而不敢登
者世利之途量輕霞以爲臉纓積雪以成軀衣前後而

猶如儼張拱而徐趨或者見之而指笑此必抱遺經行

古道之拘儒

顧志節義

殷澄字公源居胥浦在宋避諱爲戴氏父某宋節幹官家
富好施人目爲殷佛子澄性介特平生無宿諾見義必
爲避地南錢元兵入華亭南錢猶保聚不下將軍號楊
埽地者怒欲屠之澄奮曰我可無一言而死乎遂叩軍
門大言曰夫民猶水也水順則流逆則激民順則寧逆
則亂今郡縣新附將軍不撫綏招來以稱示神武不殺
之意願欲盡勦斯民乎楊怒手劒叱之澄正色曰殺我
一人活千萬人死猶生也語益烈楊感悟而止全活者

以萬計丞相伯顏聞而義之授華亭軍民都總管使守其地澄不受曰大宋亡我以親在不死顧獨不能逸乎遂野服隱居浦上時游峯泖閒人目爲泖南浪翁

郭志獨行

李智遠自號谷隱野人居頤浩寺竟日掩關澄心默坐若槁木然元兵至不去兵擒之不驚及縱之亦不喜事定月餘忽沐浴衣冠危坐手書一絕云四十三年處世中夢中成夢又成空今朝撒手還歸去木馬頻嘶物外風

書畢而逝

郭志隱逸

莊肅字恭叔號蓼塘居青龍鎮仕宋爲祕書小史宋亡棄官浪迹海上性嗜書聚至八萬卷手鈔經史子集下至

稗官小說靡所不具書目以甲乙分十門至正閒修宋

遼金三史詔求遺書危素購於其家得五百卷所著有

藝經畫繼餘譜傳於時

顧志文學
上海志

黃庚太學生能文章尤工畫宋亡不仕著樵吟集

上海志

呂德謙文穆公後世居胥浦有隱德子允恭字萊翁自宋

入元高節不仕

金山志

任良能字子益號清逸處士讀書樂道力行孝弟能詩文

省府交辟不起

上海志

衛謙字有山一字山甫號山齋六世祖仲達尙書父宗武

知常州竝有傳謙風神都雅進止可觀初登進士第調

丞永嘉未行元師及境樞密董公與語奇之版授漳州
龍溪尹辭不就鹽丁楊姓者以妖煽衆掠海上分守千
戶沙全疑邑民反側將并殲之謙亟詣全開譬以身保
無虞事遂寢陞温州路治中復辭乃立義莊贍宗族及
鄉閭之貧者建義塾教願學而無師者同邑錢參政孫
女賣謙家爲婢已劑而知之命家姬教養三年怡園具
擇世族子嫁之其爲義多類此翰林鄧義之趙松雪郡
守張西巖皆與爲文字交名人韻士游其門者無虛日
遠近識不識皆稱爲衛山齋所著有讀易管見三十卷
子德嘉字立禮閉戶讀書辟舉皆不就妻亡不再娶獨

居凡三十年至正間盜起州里解散德嘉不爲動曰吾當守死先祠下耳時人稱其孝子剛能詩有江水深深碧梨花淡淡明之句楊鐵崖亟稱之

顧志節義

衛富益華亭人自號畊讀居士文節公涇裔孫宋亡日夜悲泣設壇祭文天祥陸秀夫張世傑辭極哀慘嘗從金履祥許謙受學謙以齒齊名重不敢當北面禮許卒爲制服自以宋世遺民絕意仕進隱居教授究心性命之學創白社書院春秋社日與布衣友賦詩講道搢紳不得一與後攜仲子隱湖之金盞山著四書攷證性理集義易經集說讀史纂要耕讀怡情等錄至治閒以長子

迎養還故里不談世務不履城市或有乞詩文者辭之
一日遭微疾悉焚所著書集曰吾志晦迹安用名世況
元妙處宋儒究盡吾錄糟粕何益於後卒年九十六門
人私謚曰正節先生

陳志
隱逸

俞道善其先吳興人汝尚退翁之後宋季兵起移家避亂
至華亭愛其土俗淳厚尤喜九峯娟秀卜居鳳凰山之
南歎曰宋社已傾我輩但期力耕耳因戒子孫勿干仕
進嘗作漢瓦硯銘以寄宋室之思焉四世孫顯字彥遠
元末盜起奉其母以逃路阻大澤盜且至顯度不免默
禱天負母竟涉如行淺水盜異之不敢迫遂免於難賦

性愿直寡言笑雖造次必循矩度立義塾教授里中鄰子弟不循檢者相戒懼其聞知治家尤嚴晚年卜居祥澤里人稱澤隱處士

郭志
獨行

松江漁翁不知其姓名每櫂小舟游長橋往來波上叩舷飲酒酣歌自得紹聖中閩人潘裕自京師調官回過松江遇而異焉起揖之曰予視先生氣貌固非漁釣之流願丐緒言以發蒙陋翁瞪視曰君不凡若誠有意能過小舟語乎裕欣然過之翁曰吾厭喧煩處閒曠遜迹於此三十年矣幼喜誦經史百家之言後觀釋氏書今皆棄去惟飽食以嬉尚何所事裕曰先生澡身浴德如此

今聖明在上盍出而仕乎笑曰君子之道或出或處吾雖不能棲隱巖穴追園綺之蹤竊慕老氏曲全之義且養志者忘形養形者忘利致道者忘心心形俱忘其視軒冕如糞土耳與子出處異趣子勉之裕曰裕也不才幸聞先生之高義敢問舍所在曰吾姓名且不欲人知況居室邪飲畢使裕反其所鼓枹而去

宋史

元

費察字子壽湖州長興人徙嘉興再遷上海宋末以策干兩淮制置使補進勇副尉轉武節郎泰州指使慶元路巡檢歷遷本路鈐轄權提舉上海市舶元初授武德將軍

軍金牌千戶措置上海市舶居二十年遷宣武將軍管
軍總管兼鎮守上海總管府事沿海民船無所統或流
入盜賊寮請錄爲戶蠲其徭役而官領之可得海船數
千稍水數萬備國用乃賜虎符授明威將軍管領海船
萬戶任其事踰年丐閒遷懷遠大將軍遙授浙東宣慰
使卒贈護軍鎮國上將軍江夏郡公福建宣慰使都元
帥諡榮敏寮器局寬整倜儻而篤厚賓禮名士尤輕財
樂施人呼爲費佛子稅司重估苛取市區晝閉寮請依
額抱辦且用三十稅一之法不足則補以私錢戊子水
後官計口賦鹽期限星火寮曰鹽粥不給何有於鹽先

以鈔輸官徐取鹽付列肆願買者聽勿彊酒課不均民
破產案請以田業爲斷貧下戶悉除之鄰境牒惡民相
讎殺將獨獲之案建請招收從征日本使自贖數千人
得不死卒之日鄉人皆罷市往哭至相與爲佛事以報
之陶宗儀輟耕錄載其家斛銘曰出以是入以是子子
孫孫永如是其爲人可知子拱辰武德將軍平江等處
運糧萬戶上海初建學拱辰實爲之經理云

顧志
名臣

瞿霆發字聲父其先汴人扈宋南渡居上海父君用承信
郎霆發幼穎悟書一覽輒成誦才氣落落不羣元兵次
臨安遊騎及境霆發年二十六挺身兵閒率衆歸附一

境賴以全命爲下沙鹽場副使擢進義校尉同提舉上海市舶秩滿召見授承務郎兩浙運司副使海潮壞鹽場死者萬計霆發傾力救之流亡復還鹽事以集仁宗時居潛召對稱旨請以爲集賢學士避不敢當陞中順大夫遙授兩浙都轉運鹽使以捕蝗功改少中大夫真拜運使浙東饑亭民死徙霆發稽戶數第物力而均之課更以最事聞召見使未至而卒霆發事母孝得時物必先供乃敢嘗喜賓客樂施予西湖書院上海縣學咸割田以資之鄉鄰貸貫未嘗筆記也嘗有貧士僞作運使張文質書來謁霆發得書命門幹贈以楮三定幹鄙

其人未與霆發知之亟取五定加以溫言而遣之幹白其故霆發曰汝何知彼何不作書於汝邪時人服其量

顧志
名臣

任仁發字子明上海人世居青龍年十八舉鄉貢元兵南下平章游公見而器之署宣慰掾以招安水島引爲青龍水陸巡警官討盤龍寺叛僧有功會征交趾改海船上千戶轉漕直沽以治水擢貳都水監府境開江置牘皆仁發議之大都通惠河楊隱牘奔覆會通河淺澀汴梁黃河浸歸德府杭之鹽官海塘崩陷仁發皆嘗治之及疏導吳松大盈烏泥等河具有績效任守宰民多立

祠祀之後以中憲大夫浙東道宣慰副使致仕卒年七十三著有水利書十卷工詩善畫有熙春天馬二圖藏祕監子三賢材考城令賢能逕令賢佐台州判官顧志名臣王泰來字復元奎孫性剛狷不爲柔諧與人交稍或乖義無貴賤親疏輒面責不少假借少習舉子業由鄉貢入太學棄去放浪江湖閒所至人邀致之江西帥盧鉞事泰來以師禮未幾復棄去至元中再徵不起二十三年侍御史程鉅夫奉旨專召二人其一泰來也見上歡甚館集賢時召入論事持正不回每深語薄夜半命中使及衛士炳炬導歸以爲常同召者葉李拜尙書左丞將

授泰來官忽與葉語一不愜卽拂袖起曰無辱我乞歸
得請泰來早以詩鳴寶祐開慶閒有集行於時晚年裒
益總若干卷其游情物表發興天倪蓋世所不能羈者
精數術一日索紙書偈曰眼耳鼻舌俱是病根無出無
入與天常存書畢輪左手指曰時可矣語絕而逝卒年
七十三子謙字一初能世其學占事知來若合符契游
京師得官大被親遇至正閒乞歸出爲鎮江路總管尋
授嘉議大夫寶慶路總管致仕

顧志
名臣

陸鵬南號象翁華亭人明毛詩不仕文章與健與陸靈伯
齊名鄉里稱爲二陸著有九峯清氣集

顧志
文學

唐時措上海人家饒於貲慕義好學能古文咸淳間上海
爲巨鎮俗近商賈學校未興時措與弟時拱市韓氏屋
請於市舶提舉董楷作古修堂以祀先師集諸生爲肄
習之所至元二十八年始縣上海卽授時措爲學官

縣志

黃允恭字敬翁華亭人居長泖之灣江南新附愚民相率
爲盜家遭焚掠恭刻苦復先業篤於信義能緩急人性
至孝母吳氏垂百歲恭年踰七十溫清定省未嘗廢以
孝義旌於朝年八十七卒子鉞字宗武隱居不仕築樂
全堂學士虞集記之世稱樂全先生孫璋兩舉鄉薦用

特恩補官

金山志

湯文英字孟寬華亭人世篤孝友至文英八世同居至元

開表開復其家

順志
幸友

潘世英字積中華亭人至元開用御史薦隨牒至閩南會
汀寇林頑斷官道蹂躪鹽場煽毒齊民世英悉釋其誑誤
復業者一千三十戶興化賊起帥府分遣本道督捕選
世英從官軍有戮平民冒功者世英曰民苦脅從非本
心也請帥抵賊壘反覆慰喻皆感泣縛其渠魁以降復
業者一千五百戶初江淮賊起分兵守關世英實董之
左丞老老鎮江東遣使起關上兵使者露刃以脅之世

英曰我受兵守關兵一轉足則閩危矣使者厲聲曰汝
不畏死邪世英張髯引頸曰頭可與兵不可與使者還
白左丞歎異久之已而餘寇復至同安募義兵航海忽
安溪賊掠縣境入縣廨世英坐不起罵賊不絕口遇害

歸葬於千山

通志

蔡廷秀字君美華亭人由郡諸生試吏調江陰累陞浙省
理問所知事袁州推官用中書左丞薦擢江西省檢校
命下已遇害初袁州守將計殺土豪其餘黨匿山谷者
導寇陷袁廷秀被執三日罵不絕口死平生博學器識
沈毅宿儒先德並友重焉

陳志
賢達

羅璧字仲玉鎮江人也至元初授管軍總管鎮上海因家
華亭累功拜鎮國上將軍廣東道宣慰使都元帥換正
奉大夫都水監終於官贈護軍諡桓敏初朝廷議轉江
南粟以實京師璧獨以海運便漕舟率先道海自楊村
入不數日至京師子坤載蔭知餘姚縣歷泗州有惠
政嘗著厚俗篇

顧志
名臣

祝岫字秀巖華亭人以字行居西郊今其里猶名祝家帶
大德間爲海道都漕運萬戶府經歷陞平江路總管岫
爲人英拔豪闊篇翰清美所交皆一時名俊與趙孟頫
朱德潤尤氣誼相許卒於官子孫家吳門

顧志
名臣

凌巖字山英號石泉華亭人少習舉業宋亡撫時感事一

寓於詩鎔意鑄辭鏘鳴秀拔時流盛推許之有古木風

瓢集行世郡中九峯次第題詠昔人稱爲山史

郭志文苑

曹知白號雲西其先永嘉大族宋宣和中景修始遷華亭
長谷之西地號貞溪知白身長七尺美鬚髯性機敏至
元三十一年詔遣中書左丞鑿吳松江以策從行功最
多大德四年庸田使柳公行水復獻填淤成隄之法民
甚德之丁母艱哀毀盡禮服除大府薦爲崑山教諭不
樂辭去嘗游京師王侯鉅公多折節與交章辟屢上知
白悉辭謝曰吾聞冀北多奇士庶幾見之豈齷齪求官

者邪卽日南歸隱居讀易終日不出戶庭或放筆圖書
掀髯長嘯人莫窺其際周卽姻黨惟恐後篤於交誼若
文士皆忘元李冲劉世賢詩僧崇古生則延館死則爲
治喪葬人稱爲貞素先生

郭志
隱逸

邵天驥字千里其先洛人康節先生十世孫也高祖宗穆
始家華亭胥浦鄉天驥在宋嘗以易經中選入元不仕
以濟人利物爲心聞義塾教鄉之子弟割田資之大德
閒西湖書院毀天驥與子彌遠鼎新之彌遠常慕漢東
平王唐張公藝之爲人取經傳言爲百善百忍圖

郭志
德行

陸厚華亭人居城東白號東園散人長身虬髯博洽經史

尤喜陰符韜略諸書知兵法方兵變時將帥聞其名欲致之覓不可得往來茗誓閒兵息歸里嘗遇異人得子午按摩法療病不施鍼炳對坐笑談頃卽脫去未嘗受人直或勸之仕不應有詩集名古漁唱

顧志隱逸參浙江通志

杜元芳上海人性醇厚官德清主簿晚隱杜村構翡翠碧雲樓貯書萬卷又置別業於杜浦杜浦者周浦也村與浦皆以杜氏所居名從子希伯字正甫有潛德

南隱志

孫稷字長慶華亭人言行修謹雅有高節嘗舉文學官不就卜居橫雲山麓讀書賣藥超然物外名其居曰小山

招隱江陰王逢爲之辭

顧志隱逸

夏侯尚元字文卿華亭人幼有大志好學深思下筆數千
言立就時人稱爲小太白大德閒游京師趙孟頫薦之
爲東宮伴讀旋辭去汗漫湖海者數載後游漠北諸王
閒爲武平王所禮武平王薨郊王聞其賢招致之待以
上賓王好尚書性嚴毅寡言笑人莫敢犯文卿感禮遇
知無不言氈廬抵掌或以爾汝呼王王知其忠直優容
之會王以召命赴京文卿曰王守國北門不可輕動或
陷虎口悔將何及王不聽文卿乃馳驛還南及至都王
已被誣沒親信莫不逃匿獨文卿詣朝陳王忠孝每語
聲淚俱墮衆爲感愴書三上詔雪王冤以子襲爵或曰

公節義昭著朝野皆知王子孫必有以報公文卿曰王
被禍而已微功吾滋戚遂辭歸不復仕著有中庸管見

聚疑原孟諸書

通志參修
顧志節義

夏椿字壽之其先長興人兄杞宋景定閒爲華亭典押因
占籍華亭椿早孤事兄如父喪葬盡禮至元丁亥歲饑
椿出粟賤價以糶庚寅浔饑賤糶猶不給設粥僧寺以
待餓者大德丁未旱災鄰境攜持老幼歸之椿闢廬舍
具饘藥視其羸壯而食飲之欲去則贈以資死者給棺
以瘞事聞旌其門爲義士自郡城距海百里凡橋梁衢
巷慈幼之局養老所廬椿悉爲繕治每朔望飯囚徒死

者與之棺卽其居創義塾以訓鄉之子弟割上田五百畝以資之御史景遠爲作義士碑卒葬細林山鄧文原

志其墓

顧志簡義參
郭志獨行

何敬德字孤巖上海人家申浦之東性淳樸善治生爲吳郡張瑄行舫筦庫數年贏百千萬一錢不以自私瑄父子方倚之敬德辭去瑄貴盛向時主計客皆佩虎符爲萬戶千戶敬德方布衣蔬食遠迹自疏勸瑄父子毋嗜進厚藏速禍瑄敗盡收其黨與敬德獨不與人服其有識大德十一年杭大饑當事煮粥仙林寺中民爭食踣藉死者甚衆敬德請於杭好善有材智者數人卽菩提

寺乘夜煮粥置大甕中明旦飢民至先後列坐相向虛其前以行粥食已以次去日煮米七八石至十石六月至八月凡七十日明年春敬德復集諸好善者收聚道路路幣數十萬具瘞之夏爲粥如初始五月朔踰三十六日而敬德沒年五十七後十八日所貯錢米亦盡道路號泣曰何不延何長者至中壽今窮人無所賴矣胡長孺曰往歲湖州作糜飢民糜出釜猶沸器中人急得糜食已輒死百步閒長者夜作粥貯大甕中蓋懲湖州事也有意哉

顧志節義

任仲孚上海人好義樂善大德閒饑發米二千斛穀八百

斛以濟貧乏部使者上其事詔旌其門擢其子良佐溧

陽縣儒學教諭良輔信州疊山書院山長

願志節義

陸居仁字宅之華亭人霆龍子以詩經中泰定三年鄉試
工詩古文精書法號巢松翁晚號雲松野衲瑁湖居士

與楊維禎錢惟善友善沒同葬千山稱三高士墓

願志文學

姚玉用華亭人循理樂善至治間割田立義莊歲收租千
餘石以周宗族鄉黨建義塾於家以教鄉之子弟知府
申秉禮聞其義委葺西湖書院遷義塾其中以便學者
四方士子聞風而至者千二百人府嘗修儒學玉用功
居多從父俊讀書好禮有孝行從弟實夫克協兄志管

麻宇復譙樓率先助費孝義聚於一門鄉人稱之顧志節義

陳明字彥古上海人湖廣等處泉貨少監勇之子仕至中

議大夫同知贛州路總管府事請老授嘉議大夫揚州

路總管致仕卒贈嘉興路總管賜爵潁川郡侯顧志名臣

王德章其先金陵人占籍華亭任崇德州都目公正康明

邑人三爲立碑以頌孫濬明永樂中任禮部主事嘗使

至太倉封西洋寶船裁抑冗費民以不擾陞郎中顧志名臣

殷輅字乘之華亭人初爲上海掾史後官鹽司橫浦調嘉

興有僧告其族賊殺事久不決移輅讞卽得賊而免繫

者二十人悉脫之甲訴乙溺其子於水縣讞不自輅鞠

之乃他姓疾子爲盜私捶殺而誣乙也良民有與盜首
疑名者吏既正犯而收之輅白長令卽日釋去後以行
中書選擢知縉雲縣縣豪號兩虎者閉戶斂迹終輅三
年不敢肆有富民坐令門豎捶殺平民獄辭多連吏欲
出甲繫乙且以脫富民輅問故曰甲多子女繫之必有
辭乙鰥獨不慮也輅曰人苟畏勢利殺無罪者尙謂有
天道乎遂正其法

浙江
通志

王昭大字茂卿華亭人博綜經傳於易尤精年耄始調湖
州路學教授不以晚仕槩懷繼署桐鄉邑丞致仕至正
間年踰大耋時詔例賜致仕官金文采幣昭大美髯修

幹被服恩榮優游里陌咸尊禮之

陳文

詹潤華亭人以父號梅臞因號肖梅少有俊氣及壯以文儒爲諸暨州學正秩滿例試教授潤太息曰以我之才

試教授邪卽襦被歸

顧志文學

徐順孫字子靜華亭人父號菊存因自號敬菊淹通經術賦性純孝痛父母早亡已獨不娶以終其身嘗讀秦紀賦詩云大藥若從三島至蒼生能有幾家存時傳誦之

顧志文學

曾遇字心傳華亭人裔出宋丞相亮後博學敏文辭尤工筆札以薦授湖州路安吉縣丞致仕與王昭木詹潤徐

順孫同游時號雲閒四俊

順志女學

曹慶孫字繼善華亭人居貞溪本處州教授邵桂子之子邵娶曹澤之孫女以慶孫繼舅氏後故又名聚云延祐四年薦充平江路吳縣學教諭徙淳安未幾告歸不復求仕進杜門力學必得古人之意而止爲文平易條暢以理爲主能盡其所欲言詩清潤古淡根柢於陶孟韋柳自成一家同時虞集柯九思楊仲宏輩皆與爲文字交嘗買地崑山之陰構室以祀陸機兄弟行省聞而嘉之至正二十一年無疾而逝年七十八著有副墨集東山高蹈集懷東漫稿慶孫所居堂曰安雅人因稱安雅

先生

顧志文學
參青浦志

沈雍華亭人父騰字茂實著有雙清詠史稿雍與弟穆並
以孝友稱至正丁未夏四月三日吳松兵變禍延城邑
騰挈妻孥走避雍兄弟守家廟不去悍卒排闥入卒發
二矢雍中左髀穆中臂偃戶外卒復引刃擊雍項背穆
以身障雍跪訴曰吾兄儒者爲鄉社師不可殺某不才
請代兄死兄亦訴曰吾弟力田養親不可殺寧殺吾卒
感其義並舍之楊維禎有傳

郭志
獨行

錢璧字伯全華亭人品行端慤其學尤邃於書登至順三
年鄉榜陶宗儀早歲嘗從受業云

郭志
文苑

金子安字幼仁上海人居漢成里七歲失怙事母凌得其
歡心母嘗遭疾子安稽顙北辰求以身代母危困中忽
蘇曰適神語吾加爾壽三十四後母沒乃三十四月也
居喪毀瘠哀痛終其身鄉鄰有悖倫者往往感激改行
嘗市地於鄰除之得白金一罌亟召其人歸之時又多
其義

郭志
獨行

章夢賢字思齊上海人居青龍鎮宋秦國莊敏公棗之後
孝友通練喜賓客好施惠元至順初嘗出粟二千餘石
賑鄉里辭不受官詔旌爲義士之門與同郡管仲德等
俱以散財周急聞後至元中薦授襄陽等處營田提舉

建康等處財賦提舉以父母早亡伯兄又多疾卽棄官歸終身不仕事其兄如父置義莊以贍宗族建義塾以教鄉黨子弟兄沒撫其孤如子闔門二百餘口未嘗有閒言子元澤初爲丞相府舍人累官奉政大夫江浙財賦副總管以母老棄官歸養楊維禎亟稱之後以朝列

大夫彭德路總管府同知致仕

願志孝友

唐昱字仲明世居華亭徙上海至順庚午郡大水捐粟五千斛上之官以賑境內其私賑益無算事聞授浙西袁部場司丞秩滿轉江西蘆潭批驗所提領以廉幹謹慎稱年七十乞休賜七品秩授徽杭等處樵茶副提舉自

庚午後歲屢歉發私財煮糜濟飢至老彌篤壽九十卒
生四子九孫五世同居內外輯睦昱業不踰中人而能
好施遠近皆賢之

郭志
獨行

徐初字本道華亭人居青村早喪母父嬖後妻惑其譖初
事之益恭父暑月病疽穢惡流衽席初身自澣滌不解
帶者經月父感悟喟然曰汝真吾子也異母弟亨無術
業初甚愛之至正丙申浙右警初練鄉里子弟數千備
禦或誣其有異志縛送泖上軍初至軍門呼曰吾欲反
卽蹈海去耳寧猶戴吾頭爲將軍得乎且將軍欲有所
舉事宜分別良莠以順人心天下寧有白頭作賊也帥

壯其言釋之且薦以官不就

顧志孝友

徐誠字信之上海人元至正間父爲金玉局大使嘗遇疾醫禱皆弗應因割股和藥以進疾尋愈家素封自奉甚殷獨好施予三族多待以舉火庚午辛未歲大疫爲饑粥以食餓者活萬餘人

顧志孝友

趙恭字思恭上海人家貧好學涉獵經史性至孝母方氏臥疾久不愈恭憂悴不知所爲乃齧臂肉作羹啖之疾尋愈父通患蠱疾其弟敬割股肉爲糜以進亦愈時並稱之

顧志孝友

王太初字古心通易有貴土集漁樵稿筆錄行世

上海志

陸侗字養正詩典贍雄偉其題詠景物尤善鉤想往往出人意表同時若王泳趙鎮殷汝舟姚玳俱能詩文汝舟

尤長於經學

郭志文苑

姚玳字比玉華亭人居金澤家甚貧喜讀書里中大姓林氏爲延名師盡出藏書教之卒成業楊完者兵亂玳奉母陳氏逃至河不得渡母曰兵至吾誓不受辱遂沈水玳倉皇投水救之負母而出玳嘗中流矢佯死伏尸間得逸去奉母過河母命潛往某處取所藏金又爲張士誠兵所虜疑從苗中來縛送洲上軍會有辨得免主軍者因署爲部吏玳朝夕憂以母病革報泣訴得暫假以

小舟載母遁母病思魚羹暮夜莫能得家蓄烏鰂甚馴
囑之若有會尋出戶致白魚盈尺以歸供母人以爲孝
感兵息浙行省辟之以親老辭人益高其節云

郭志獨行

王文澤字伯雨華亭人家風涇後遷上海祖大言父京竝
有名譽文澤學問尤邃詩文高古累舉不第爲府學訓
導卒所著有尙書制度圖纂三卷自立齋詩文十卷子

默自有傳

陳志文學

任暉字東白華亭人祖仁發歷官都水監父賢材繇祕書
監遷考城令暉喜文史善賦詩脫去凡近與楊維禎游
嘗邀至其家校讎商榷維禎極愛重之有東白集

郭志文苑

呂良佐字輔之華亭人居璜溪好學有才氣與楊維禎陸
居仁諸公游嘗爲應奎文會遠近聞其名投卷者甚衆
至正兵起總帥與語大悅版授華亭尹辭請以白衣議
事帥賢之俾自集白甲保障鄉里全活者數千家郭志文苑
王默字子章一字伯靜上海人文澤子身長八尺美鬚髯
談吐高亮少任俠多技藝弱冠更折節讀書書法趙孟
頌行筆甚捷徵至京書金字浮屠經擬官翰林見時運
已否力辭歸名聲大振求書者填戶父沒盡鬻書買山
以葬廬墓下者久之雅好泉石遇勝處輒忘返尤喜爲
人排難解紛奮不顧利害張句曲稱其豪宕不羈有姜

白石風子基洪武初舉孝廉爲潞州判官嘗著雪齋明
鑒錄秦裕伯亟稱之

顧志
藝術

彭汝器字宗璉上海人博學有史才嘗評宋史謂杜后遺
命立太宗與宋宣公舍其子而立穆公同爲貽亂於後
太宗問傳代之事趙普知爲太宗謀而不爲太祖謀欺
天之罪不可逭神宗將崩宣仁豫製小黃袍以備倉卒
立哲宗宋賢后當以宣仁爲冠貝瓊爲撰筆諫軒記深
許其識古今得失大義云

郭志
文苑

余瑾華亭人居簞山因自號笥隱生幼時嘗夢掘地得大
小壘數百笏遂善屬文長好遊名山至正閒自具區道

毘陵渡江抵淮泗以直言干在位者弗用歸山中著史
補斷丹崖夜嘯金聲錄玉露吟若干卷或勸之仕則曰
大丈夫仕當爲天下除殘剗暴否則不如抱膝坐耳遂
終其身

顧志隱逸參
楊鐵厓集

陸德芳字顯叔華亭人至正壬午舉人授般陽路學正未
幾挂冠歸時元平章河南沈照避地海鹽之甘泉鄉德
芳傭書其家俄與談經史論時事沈大驚詢知所自遂
以女妻之明初以逋臣薦不赴

構李
詩繫

杜英發字俊卿上海人祁國公衍九世孫仕爲建寧學正
陞敎授歸隱西霞浦土號西霞道人初季父某無後嘗

養莫氏子爲其幼復以英發爲後及季父沒悉以產歸
莫氏子復爲之冠娶待之不異同氣族困於徭役首倡
置義田儲粟若干石以資之鄰里婚喪皆有給其勇於
義如此然貲產不逾中人云

顧志
孝友

陳良用字子忠宋太傅堯咨十一世孫至元丙午值歲大
祲良用輸粟千石以賑飢事聞詔授冠帶洪武庚戌卒
年八十七

奉賢
志

馮濬字淵如華亭人詩載玉山集昔人評其清俊

錢應庚字南金華亭人贅居柳上與邵亨貞同里閑以文
字交其後門人曹幼文闢室館之名曰一枝安

俞庸字子中其先嘉興人占籍上海仕爲推官詩載大雅

集子俊字子俊號雲巢麗水巡檢改平江判

檣李詩繫

衛仁近字叔剛華亭人德嘉之子也嘗以詩質楊維禎維

禎稱其奇節興象可追盛唐有敬聚齋詩稿世最稱其

秋夜曲白苧詞九山讌集等篇

郭志文苑

唐華字明遠華亭人隱居小蒸累薦不仕善鑒鼎彝圖書

失物不校人服其雅量

田茂遇水西高逸詩

姚汝嘉號愚默華亭人學行樸實爲鄉里師年八十餘猶

讀書不倦與天台楊仁壽冀北李璋無錫華文瑾結社

卒並葬陶溪之純陽庵時稱陶溪四隱

陳志游寓

周之翰字申甫華亭人幼穎悟博究羣書尤通象數之學其著述有乾坤闔闢天地生成陰陽變化山川流峙四圖并贊以發明其蘊奧講授於鄉以壽終

通志

沈鉉字文舉華亭人隱居泖濱築室曰野亭楊維禎爲之記倪瓚高啓皆有詩子復吉通儒書精醫術游於中都作植芳堂天台王璞四明鄭真記之

青浦詩傳

楊謙華亭人別號竹西世居赤松溪上好讀書不樂仕進海內高人逸士多與之交嘗築小樓登眺海中大小金山題曰不礙雲山樓楊維禎貝瓊俱爲之歌詠

郭志隱逸

孫道明字明叔華亭人居泗涇博學好古藏書萬卷遇秘

本輒手自鈔錄嘗築映雪齋延接四方名士校閱藏書
爲樂又造一舟曰水光山色徜徉南浦自號停雲子嘗
與陶宗儀共汎宗儀製詞道明卽諧入調中倚洞簫吹
之與權歌相答極鷗波縹渺之思宗儀有記

陳志
隱逸

陸泳字伯翔華亭人隱居大蒸盡心農事采方言習俗作
田家五行以占豐歉楊維禎陸居仁敘而傳之

顧志
隱逸

王泳字季瀾上海人衡山主簿鏞之子也鏞卒遺命以庶
弟奉其生母泳悉推舊田宅與之所居貧薄躬執家事
晏如也自號靜習或問靜何習輒對曰習不繇靜未嘗
學也門生輩爲買龍華之原營壽藏泳角巾藜杖逍遙

作歌歌閱長嘯而返梧溪王逢爲銘其藏

陳志

楊德懋華亭人善書法通左氏春秋尤究心太極圖通書

買田澱山之西躬耕不仕明初徵天下真才郡縣薦之
命下辭曰唐堯聽巢父之洗漢光遂子陵之高富貴非
吾願也卽自眇其左目以示廢疾不可用優游湖上卒
年九十二里人稱之爲自廢公云

郭志
隱逸

唐時字耕隱華亭人父崙以高節著時年三十始娶夏椿
延爲館師供饌豐厚時曰吾素性淡泊不欲以肥甘損
福也夏重之鄰有孀婦餽以餅餌正色拒之夏聞之益
加敬焉張氏據吳杜門不出陶宗儀爲作義士傳

陳志
篤行

葉以清字子徵其先京口人祖懋宋末避地家華亭以清
尚氣節有古俠烈風德清尉劉景告以三喪不舉卽貸
五十緡監黜縣伯顏疾作屬妻子曰我死母老當往依
華亭葉子徵顏果死以清夢顏至曰以八口累君越二
日其妻子果奉母至爲收卹之苗兵據松江張士誠逐
之其僞尹鄭煥欲熱巨室黨苗者以清奔控獲免爭持
金帛走謝辭不受時避地者建德尹楊瑀平江尹貢師
泰建德通守毛景賢咸依以清男女未婚嫁者皆爲擇
配瑀卒貧不能斂以清葬以禮同門友胡方死無子躬
爲斂藏藉遺物歸其弟妹浙省員外王國賢以囊橐留

清所國賢死完歸其家淮南江浙聞其風辟命交至皆
不赴晚築室蕭塘遠迹城府躬耕以食一時士大夫皆
慕之如古人云

顧志節

周顯字光遠華亭人世居千山負奇氣涉獵經史閒喜神
仙家言丁父憂哀毀骨立三年不與燕樂奉母孫氏尤
謹所居里歲輸官租四萬石民困重斂多負逋慢期顯
具爲約遂無敢後者吳松江故道塞詔所司開濬御史
臺分官督視僉事范某素知顯才咨以方略顯取方尺
紙爲圖指畫形勢甚悉畢事御史舉酒勞曰是役君之
力也先是都監與守性緩急不同言語多忤會宣撫行

郡有奸民各投牒交訐受賄不法事下嘉興守杜某覆
治顯曰父母有過子當力諫今以論政不合使奸民迎
合詆誣吾徒奈何坐視遂詣二人備論所以皆感悟痛
自責相好如初杜守聞之亦抵奸民罪貢師泰稱之曰
聞義而勇不謀於人好仁而公不私其身卒年四十八

郭志
獨行

朱弦字孟清上海人性孝義邑令閻九柱器之請於其父
乞爲義子閻罷官貧窶弦敬養無缺沒後買山以葬之
復營別室母事閻妻三十年民有賣屋償逋無所棲者
弦爲贖還友人趙謨亡命教授某被召發顛疾走山

遇弦竝脫於難

上海志

瞿懿字彥德上海人霆發從曾孫也幼孤事叔如父同居三十年叔以非罪頌繫懿泣訴於官曰合坐懿叔無與官義之釋歸叔病沒復延師教其子時習仕潯州路總管妻張氏鍾氏前後事姑竝孝敬云

上海志

戴光遠字君實華亭人居白牛鎮其父賜谷規創義塾以淑里人未竟而沒光遠經畫成之作堂室四十五間貯圖史延師儒招學者割常稔田五百畝贍之黃學士潛有記

郭志獨行

全翁不知其名元季避兵泖濱耕田讀書爲樂倪瓚慕其

人訪之翁但極言好名之失且曰君輩得毋山林養望
以爲名高者乎瓚有愠色辭去後江南名士就徵多不
免人始服翁之高今其裔爲平湖陸氏

寒畹志